

四庫全書

子部

欽定四庫全書

翰苑新書後集上卷二十二

上皇帝表

奏請

請皇帝御正殿復常膳

黃竹坡

萬旅戒嚴頃勤勞於邊戍九重軫念尚貶損於朝儀惟
盛德之動天故殊方之聽命敢輸誠悃冀復彛章臣等
入詞竊以虞舜之征有苗文王之伐獫狁非聖神之黷

武由夷狄之亂華及其畏慕而孔懷則亦縱釋而不問
恭惟皇帝陛下天開聖斷智輯人謀痛九廟之荆榛弔
兩河之塗炭且事之皮幣終莫厭於貪林其詰爾戎兵
以修予之疆理念王師之在道適塞事之方興惟干戈
省厥躬敢深居而自佚猶芻豢悅我口視平日以奚安
然節解懷破竹之憂宵遁有曳柴之懾盡驅遠敵亟返
窮荒流徙既還疆場如舊伏望皇帝陛下靈承眷命祇
答籲言既觀平定之期願復崇高之典金吾煥伏列會

弁以如星玉食充庖示皇王之惟辟

進文字

進大學衍義

真西山

汗竹雖勤何補聖經之奧食芹欲獻誤蒙天語之溫以
十年纂集之功欣一旦遭逢之幸

中謝

惟大學設八條

之教為人君立萬世之程首以格物致知示窮理乃正
心之本推之齊家治國見修身為及物之原曾子之傳
獨得其宗程氏以來大明厥旨迨師儒之繼出有章句

之昭垂臣少所服膺晚而知趣謂淵源遠矣竇東魯教人之徽音而綱目粲然乃南面臨民之要道曩叨侍從論思之列適當姦諛蒙蔽之時念將開廣於聰明惟有發揮於經術使吾君之心炳如白日於天下之理洞若秋毫雖共絲雜進於虞朝豈魑魅能逃於禹鼎不量菲薄欲效編摩遽罹三至之讒徒結九重之戀既投閒而置散因極意於研精畎畝不忘君每惓惓於報上藩牆皆置筆幾兀兀以窮年首綴聖賢性命道德之言旁采

古今治亂安危之迹必提其要皆聚此書凡諸老先生之講明粗加談括於君子小人之情狀尤極形容載瞻海岳之崇深期效涓埃之裨補茲蓋恭遇皇帝陛下乾旋坤轉日就月將於緝熙單厥心基命適隆於成后念終始典于學遜志克邁於商宗方將切磋琢磨而篤於自修定靜安慮而進於能得事欲明於本末理期貫於精粗適粹成編冒塵清燕止其所止願益加止善之功新以又新更推作新民之化

進光宗御集

王格齋

雲漢為章莫閱寶儲之彩風雷作號俾繙金匱之藏勒
成一經昭示萬世

中謝

竊以聖人肆筆初何意於成書

天下觀文乃有功於範俗繫隆昭代適駿先猷恭詔編
摩之臣彙列昭回之次煥然可述施及無疆恭惟光宗
皇帝學富月將聖高天縱得書之體得言之解上掩百
王如日之升如月之恒下飾萬物疇昔燕閒之御從容
翰墨之親周文郁郁乎宏賁盈成之治虞書渾渾爾丕

昭精一之傳陛下聲欲廣文道能繼禹作者之謂聖敢
忘繼志述事之心得其所以書洞見經天緯地之妙肆
命臣工而纂輯載揚帝典之光華緗帙縹囊寶為大訓
赤文綠字皆聚此書臣等猥以謏聞膺茲隆旨玩歲愒
日空殫淺見於管闕血指汗顏深覺聖言之天遠

進重修七司令

王格齋

制而用之謂之法所期合古而便今變而通之存乎時
當亦舉偏而救弊立為成憲允屬昌辰肆令億兆之心

具曉畫一之意

中謝

竊以著為律疏為令要皆所以範

民作者聖述者明亦共圖於經世必揭便觀之象用陶
不倦之民以時纂修為世檢押陛下堯綱具舉舜法可
傳左規右矩前準後繩以為民極詳法畧則本數末度
則有司存粵從寶厯之紹承咸仰聖謨之宏遠五服薄
四海臂使指而畢從八御統萬民網在綱而不紊猶恐
弊生於所忽殆將功敗於已成爰制詔於臣鄰俾科條
於令甲布在方策允釐百工鳧居鴈聚之浩繁同歸於

治金科玉律之明白可舉而行勒成一代之書用示九
圍之式臣等賦材謏薄庀職凌兢繼晷窮年空玩歲日
而何補奉命承教乃得聖王而為師雖幸及於奏篇猶
未知於免戾

進嘉泰頌詩

應松湖

魏我丹禁上瞻帝極之嚴繪畫紫清曷寫天容之妙披
彈窘短隕越兢惶竊觀自昔帝王之功雖卓犖俊偉而
不可及必得名世文學之士益鋪張潤色以垂無窮載

之簡冊則炳炳如丹播之管絃則洋洋盈耳商之猗那
周之清廟固已跨越千古而魏乎漢之燕然唐之磨崖
抑欲追倣三代之作者於昭駿命肇啟鴻休閑儀已七
於六經懿鑠可三於二典何人筆老載膚慶厯之詩有
士管窺僭陳嘉泰之頌陛下清靜玄默濟哲溫恭丕嘉
繼照之祥瑞撫重熙之運茅茹彙征於清列芝葩秀產
於齋房稽古右文屈翠華於璧水蒐兵耀武赫黃鉞於
轅門倬彼雲漢昭回於天作繪星辰彰施於色維今臺

閣實士淵林顧未有鏤白玉以告名山汗青竹以絢華藻缺焉鉅典薄若輿情臣猥以謏聞親逢曠舉儼穆如之作頌輒斐然而成章冒貢穹隆退慙骯骯雖擬金戛玉無庸瓦釜之雷鳴然擊壤歌衢共和簫韶之獸舞

繳進御書墨本

御書宗學碑進墨本

方秋崖

倬彼雲章峻極麟鬣之表刻之琬琰昭回象緯之光奉墨本以進呈覺神毫之飛動中謝臣聞惟聖有作與天

為徒故雖筆札之間罔測機緘之妙無以鍾王之陋跂
我宸奎要皆舜禹之傳形諸心畫八法具嚴於摹勒一
毫不失於本真恭惟皇帝德以日新學以時敏聲為律
身為度夙成神聖之資河出圖洛出書盡闡乾坤之秘
肆璇題之巨匾煥瑤號之靈暉有開斯文用作爾寶臣
恭想萬幾之暇乙覽思皇夫子生民以來未如今日宗
盟異姓為後敢負吾君

繳進旱傷賑恤御筆碑本

代陳帥

施養浩

聖訓丁寧曲軫救苗之念天心昭格聿開助順之祥刊
琬琰以為章瀆冕旒而冒貢竊以君有常道戒在畏天
民之至情切於望歲十雨五風之協非智數之可求九
潦七旱之災雖聖賢且不免至若令之人而人應禱於
天而天從在前古以為難於盛時而親見恭惟陛下愛
民惻怛求治焦勞惜帑庾之藏惟賑饑則傾廩而無靳
戒髮膚之毀至為民則剪爪而不辭屬一方之旱傷勞
九重之宵旰謂和致祥而乖致異應每在人故言如絲

而出如綸咎先責已精誠所感叶氣嘉生農力於艱飽
策笠一犁之雨歲今其有藹郊原萬頃之雲往時溝壑
之捐今日袴襦之詠害既多而利益廣憂之切而喜彌
深臣叨領使華寵頒宸札侈賜式剡於藥石飛函敢奏
於摹篇窺翔龍躍鳳之文既欽承於大訓草佩犢帶牛
之俗庶勉効於寸長

進貢

崇州進貢紬斑布

李梅亭

屏西方之棘莫輸螻蟻之忱漚東門之麻竊效狐狸之
織愧精麕_麕之不度肅恭敬以來將恭惟皇帝居上不驕
取民有制念彼褐夫之褐成於紅女之紅質匪種華綿
以紺緞之飾文非具錦比諸黃潤之筒是雖蜀產之微
俾效齊官之戲臣承流天角修貢土毛大衛文之衣當
退明於侯度褒公孫之被願謹簡於賢人

外國修貢

占城國王修貢

唐仲友

僻處海隅久被王靈之寵遠地方物聿修臣職之恭輒
剡奏封上干典屬竊以越裳重譯聞盛德而歸周槃木
獻歌懷至仁而頌漢惟一人篤近而舉遠故百蠻慕義
而向風況小邦雖介遐陬在昔日蓋為列郡象林畫邑
嘗歸輿地之圖銅柱分疆尚著伏波之蹟樂推中土多
有歷年方藝祖開基首駿奔而來賀迨累朝繼照亦踵
至而貢珍嘉種助於豐年奇獸充乎上苑每荷蓼蕭之
澤灼知葵藿之心頒詔綍以丁寧錫乘黃而蕃庶臣欣

逢興運切撫故封文照分輝聊偷安於蟻垤堯天在望乃
趨賀於龍庭敢陳任土之儀少効包茅之入恭惟皇帝仁
同一視道合三無舞千羽於兩階誕敷帝德執玉帛者萬
國咸造王庭豈止綏哀牢而開永昌方將發西戎而撫交
趾容光必照不遺僻陋之區岐道有夷屬在要荒之服臣
占風服化就日馳誠涉萬里之瀛波第勤輸蓋夢九重之
鈞奏徒恨戴盆誓彈綿薄之忠永答龐洪之施

辭表

宰執辭免

辭免左相

方秋崖

囊封上奏未移嚴瞻綸旨中頒莫回淵聽但置相者九重之獨斷而竊位者衆論之共譏蓋以宰相豈序進之官廟堂非苟安之地詎容老朽仰累熙朝中謝臣恭惟神聖之勵精思與士夫而更始宸奎申飭煥於慶厯開天章之時謨訓丁寧繩以紹興及乾道之武振權綱於親擢洗習俗之淫朋殆望治於期月之間將救弊於波

瀾之倒此臣鄰之憂責方重匪王佐之器能孰堪而臣
齒髮已衰股肱何取恥君不及堯舜自揣臣愚當魏嘆
無蕭曹曷稱上意既力陳於遜牘乃尚閱於俞音敢以
固辭斷非所據伏望皇帝亟還異命別採師言令出惟
行寧若圖終之愈官不必備亦奚虛左之嫌

再辭免

方秋崖

使璫將指不違咫尺之威宰鉉非才難避再三之瀆凜
乎臨谷尚此循牆臣聞天生不世出之興王時則得非

常之哲輔惟尹咸有一德粵繇心腹之同惟說命總百官默契精神之表茲所謂風雲之會用能成霖雨之功夫何聰明獨冠於羣倫乃以庸儒進持於魁柄股肱之墮體貌謂何伏念臣起自孤寒生而拙直今老無能為也屢陳閑退之私德輜鮮克舉之曷任變調之寄則將焉用寧勿固辭伏望皇帝憐臣下愚而不移察臣中立而不倚雖詢茲黃髮神聖殊知然授以赤心治安長策願趣還於成渙庶允稱於僉諧

辭免叅知政事

洪平齋

曠職北門未遑引疾進班東府乃誤顯除殊旨驟頒瘁躬罔措伏念臣愛君有志經世無方頃奉詔以朝趨嘗指天而默誓摧頽華髮幸逢千載之良時突兀丹心願以一身而奉國下固不敢詭隨而規利上亦不敢矯激而近名倘諫行言聽於當世小有補焉則朝論夕思在微臣不啻足矣既侍閒燕深蒙簡知欲退三留每從容於天語細書一札或安假於雲章政使縻捐未足報稱

而或取榮太過未耄先衰自戾事於文闈旋疲神於賓
謁風邪湊至言動俱妨雖祈予告之思尚負養疴之愧
倣聞異數滋震危衷仰惟上聖之勵精宜得偉能而共
政使臣筋體無苦猶當審分而固辭況臣灾疾方挺其
敢貪榮而冒受伏望皇帝照臨忱懷隱惻孱庸亟取寢
於新綸俾姑仍於舊貫鉅末溢少紓末路之顛踣藥
石有瘳尚竭餘忠於獻納

辭免參知政事

洪平齋

使璫狎至方戰越於新班詔札鼎來未允俞於微悃危
侔臨谷辭迫循牆伏念臣弱羽不可高飛驚駕焉能遠
適入朝見嫉防市虎之相侵憂國無聞笑井蛙之奚算
自參宥畫益負空餐忽叨制渥之私俾預政途之列倘
貪榮而不懼必獲戾以何逃伏望皇帝陛下責實循名
量材受任憐孤蹤之安用寢茂命於已行別選異能式
隆上治

督視辭免樞使

方秋崖

邊圉繹騷敢憚師干之役樞庭宥密難叨使範之華用
荐瀝於愚衷覲終回於聰聽伏念臣屢更煩使曾幾微
勞維有之是以似之竊愧西平之子今老矣無能為矣
盍投南嶽之陰封章凡幾上而乞骸時事每一思而掩
涕適此交馳於羽檄詎容高臥於巖廊矧帷幄之無籌
孰執其咎既甲兵之有問當諉之誰將慷慨以請行肯
趙趙而避事惟是仍政塗之機柄陟使領於神樞過竊
寵榮實踰涯分恐非在師之吉有乖受任之心伏望皇

帝穆然周思赫以獨斷念四郊多壘非人臣媒利祿之時使五大在邊豈聖主馭英雄之畧無嫌反汗俾遂牢辭

再辭免

方秋崖

事君之誼唯命東西董戍之權以人輕重初不在班聯之峻陟使之溢涯分而疾顛未格四聰用忘三瀆伏念臣錙銖之福易極餅壘之量已盈雖一夫向隅為已憂何堪任大今四郊多壘則臣辱敢復辭難故枕戈不憚

於驅馳而出綽過優於假借若稽督視殿有故常在紹興時則義問以知院行在隆興時則汪澈以叅政往要皆下丞相之一等安得與同日而並除臣實何人輒干公議伏望皇帝亟收渙汗以繹師虞惟明主可與言當無負出師之表仍舊貫何必改觀仰循列聖之規

又辭免

方秋崖

體貌雖殊洊披十行之詔等夷必辨寧干三瀆之誅伏念臣受任非才叨榮過分機庭使領維均承弼之兼官

政柄參釐實下台衡之一等矧總師干之試可班禮範
之崇伏望皇帝亟還明綸昭示丕桀座為起輿為下蓋
獨隆一相之儀車既攻馬既同是以整六師之訓臣何
敢爾天必從之

宰執辭免外除

代衛叅政辭免知福州

李梅亭

易地非才輒控告歸之請自天有命備宣均逸之恩雖
當祇誦於堯言猶冀趨銷於漢印伏念臣強顏一出屈

指五年頃守湘濱既無善狀迨移江右亦愧空餐游嘗
丐祠未蒙賜允十事九律之是守姦猾怨之再衰三竭
而不休顛隲必矣誠知樂土今在全閩至因元會以選
侯尤且清朝之重遠然臣欲遂臥疴之願何必復貪坐
嘯之榮環轍而卒老於行雖皆王事御馬者不窮其力
是出君仁伏望皇帝洞鑒忱誠收回成命別求良吏俾
之表東海之民姑待病夫退而祝南山之壽

侍從辭免

辭免刑部尚書

方秋崖

相寄四年屢勤盱食璽封一札乃陟秋卿大驚羣聽之
公愈重孤蹤之懼斷非所據故敢以辭臣懼彼裔夷久
為邊患每念主憂臣辱之誼夫豈文恬武嬉之時忽賜
詔以東來趣提師而西援譬之捧漏甕而沃焦釜敢姑
徐徐恨不殪封豕而斬長蛇至今鬱鬱猶幸蔡城之雪
夜自驚淝水之風聲蓋守臣百戰而卻之尊乃勇耳其
將士三軍之勞也書何力焉烏可貪天以為功所謂因

人而成事此而僭賞誰不厚非伏念臣有安邊之志而無守邊之才有憂時之心而無濟時之策雖驅馳之老矣惟稱塞之茫然宜若默幽敢圖進律兼昨塵於遽閣已驟躡於崇階豈有纔陞直學士之班又復遽行大司寇之職茲為異數恐負洪私伏望聖慈廣訪僉諧亟收誤獎毋以文昌之華近付之外服之妄庸如免疾顛誓當忠報

董侍郎再辭召命

李梅亭

忱詞上徹冀寢召音溫詔下頒未敘俞旨敢輸悃悞再
瀆威顏伏念臣本出常才濫叨重寄使之牧養猶可詭
於民庸責以規恢實未嫻於將畧自戎帥殞身於疾戰
致遠敵忘命於長驅果若人言謂必失魚鳧之國常有
天幸乃遂殄蛇豕之妖然此寇得至腹心之間使斯民
重罹肝腦之苦雖云幸勝何足贖愆王言大哉固有憫
勞之語臣罪多矣尚何選表之云伏望皇帝斷自乾剛
收回渙號倘念殲渠魁之微績未忍加誅願乞禦魑魅

之餘生姑令置散庶師言之可掇亦愚分之少安

侍從辭免外除

何尚書辭免除職與郡

李梅亭

引年籲天期於從欲畀職分土猶是誤恩敢忘三瀆之嫌更乞重申之命伏念臣壯猶無用耄復奚為深虞簪筆於甘泉妨賢者路故願挂冠於神武為聖人氓若加寶閣之隆名且領銅符之重寄是丐閑而就劇且未退而得遷藉令齒宿而意新猶當知足矧復心灰而形槁

難更强顏伏望皇帝曲徇忱誠收回成渙放牛歸馬使
逕迤於山林飛鳥泳魚終不離於天地

辭免內除

辭免大府寺丞

方秋崖

提師西援偶退賊於孤城賜詔東來驟進丞於外府雖
懋賞者國家之典然盡忠者臣子之常何有勞能先承
獎賚臣曾微他技實起諸生間嘗誦儒先長者之緒餘
亦羞與武夫健將之等伍迫於師友其義在三憤此戎

夷有死無二乃者韃靼淮甸兵震江流竊憂丙枕之莫
遑况復庚牌之甚遽譬之奉漏甕而沃焦釜敢姑徐徐
恨不殪封豕而斬長蛇至今鬱鬱所幸蔡城之雪夜大
驚淝水之風聲迄解重圍盡犇羣醜此蓋將士三軍之
力與夫守臣百戰之功臣則奚為而冒斯寵伏望聖慈
深念君臣之誼殆猶父子之間幹蠱者職分之當然能
家者勲勞之焉取亟賜轉圜之聽毋嫌反汗之言

辭免提舉文字

辭免提舉國史會要玉牒要略 方秋崖

贊化鈞陶一無可取提綱筆削四者難并方此懇辭詎
容忝冒伏念臣懷鉛抱槧本起諸生當軸秉鈞寧堪守
相自慙文墨莫補汗青史有三長與聞雖久慮無一得
典領何堪伏望聖慈毋循故常趣還成渙將令簡冊罔
愧詩書

辭免起復

起復知州

方秋崖

緣墨臨戎事非曩典詔泥假守情駭誤恩幸生孝治之
朝敢干名教之罪三綱所繫九頓以辭伏念臣本自諸
生粗聞大訓金革之事無辟其如禮何血氣之屬有知
矧伊人矣久慨隙駒之過相傳胡馬之驚時則師友責
之以急難重以軍旅諉之於憂患力戰峴山之北載驅
淮浦之東蓋嘗揆之此心已不容於清議然猶諉曰王
事之孔棘亦奚忍於私親之獨懷匪以謀身庶其藉口
今乃班之匠簿付以州麾登堂而宣上德音孰為教化

下車而問民疾苦自愧簡書豈惟不肖之孤見非有識之士言觀忠孝恐累聖朝伏望皇帝篤叙彝倫誕修人紀矜臣報親之日短難勝風木之悲察臣事國之時長未憾桑榆之晚母嫌反汗何吝轉圜變禮豈盛世之常第深感嘆終制者聖王之則別効奔馳

翰苑新書後集上卷二十二

欽定四庫全書

翰苑新書後集上卷二十三

謝表新式

登極赦

謝今上皇帝登極肆赦表

陳寶勳

具位臣某月某日准遞到某月某日皇帝陛下登寶位
赦書某謹率僚屬望闕遥謝奉行訖者乾旋坤轉正龍
御於治朝雷厲風飛侈鴻恩於薄海為民更始與國同

休臣某誠惶誠懼頓首頓首恭惟皇帝陛下紹廣文聲
繼隆禹緒謂孝者百行之首方力倡於九重而仁為四
端之先宜丕宣於六合矧義馭中天之始正衆區就日
之初要使有生咸歸不殺爰大敷於曠蕩以盡削於滋
章臣濫守周畿俶瞻魏闕金雞初植已共傳寬大之書
銅虎久分當誕布哀矜之詔臣無任瞻天望聖激切屏
營之至謹奉表陳謝以聞

明堂赦

謝明堂肆赦

李梅亭

至治馨香備成熙事湛恩汪濊敷錫庶民沛解澤以旁
流徧坤垠而純被

中謝

恭惟皇帝陛下靈承景命薰叶

嘉生重屋九筵藏文武配天之禮十行一札布禹湯罪
已之言盪垢滌瑕漸仁摩義臣濫分銅獸阻聽金雞呼
萬歲者三莫克仰觀於萐莆襲六藝而七但知載詠於
蓼蕭

謝明堂肆赦

李梅亭

重屋精裡降百祥於作善端門肆赦斂五福以錫民行
葦恩深蒙蕭澤廣中謝恭惟皇帝陛下側身修行至誠
感神伐崇崇降無復昆夷之難侵蔡蔡潰皆知王祭之
供迄用熙成靡懷專嚮爰作雷雨之解用脫桎梏之蒙
臣濫綴將輸敢稽宣布五刑有赦知無嘉石之囚萬國
驩心願謹總章之訪

謝明堂肆赦

劉後村

重屋肇裡迄成熙典端闈肆眚誕布寬書大號一傳驩

聲四起

中謝

恭惟皇帝陛下正位凝命畏天愛民謂三

歲親祠既示精虔之意而萬方何罪爰推曠蕩之恩禁
網悉清幅員胥抃臣肅聆詔旨寅奉藩條佩玉麟之符
雖慙共理需金鷄之澤庸廣至仁

玉寶赦

謝玉寶赦

趙南塘

大寶藏珍禮儀既備端門設蹕慶賜遂行弗圖獻歲之
元乃獲自天之祐

中謝

恭惟皇帝陛下統承先烈運會

中興營丘以東舉城而來附窮髮之北款塞而乞盟戎
衣不試於一兵廟器坐還於萬里螭文壓紐增永鎮於
山川虹氣薄霄重泰和於雨露爰盼渥澤用叶嘉祥湯
德解其網羅下皆翔舞虞恩動乎筦籥孰不鼓歌臣幸
甚鰥生陶於聖化何敢贊汾陰之寶躡廁大夫所願親
山東之滌懽迎司隸

頌朔

謝宣賜歷日

李梅亭

乾統天而用九敬授人時巽申命於先三以前民用成

書誕布率土均驩

中謝

恭惟皇帝有孚惠心無疆大厯

纂堯之緒肇新景子之元數舜之功甫底撫辰之績昭
茲鳳紀賚及侯藩臣承之鎮南蒙恩頒朔萬斯年佑萬
斯年佐未能揚屬於歌詩五百里甸五百里侯所願宣
明於聲教

謝宣賜厯日

李梅亭

改元以順天道昭然祖武之繩命厯以授人時謹乃侯

邦之度清臺盼課黔鄙知榮恭惟皇帝陛下禹數在躬
周年協卜修金木水火土穀九叙惟歌證雨暘寒燠風
時五年而定和欲均於玉燭賜爰廣於璽書臣涉筆負
丞桴瓶假守觀四岳羣牧雖知無預於會朝通九夷八
蠻亦冀悉沾於正朔

謝宣賜曆日

劉後村

閏定四時方謹歲華之始王大一統尤嚴歷法之頒聲
教所加觀瞻丕改恭惟皇帝陛下握符御極正事承天

有甘石以步占星躔交燦命羲和而出納日馭順行肆
令同宇之間皆覩清臺之制臣敢不竊推疏密式廣布
宣正月始和匪特觀於象魏三時不害冀兼足於扈農

謝宣賜曆日

陳寶牕

承堯之運正玉衡稽驗之初行夏之時又寶曆布宣之
始聿前民用共體君仁竊以先天後天之文首陳羲易
出日納日之制肇載龜書蓋聖帝明王奉若之原非淫
巫瞽史步占之具恭惟皇帝陛下道嚴居正治本探端

謂析因夷隲之宜莫難齊者民事而弦望晦朔之度莫
易失者時幾肆令課密之書庸表更新之治臣承流輦
轂拜賜闕庭之一日以放行已先外服萬斯年而統御
長拱中宸

謝宣賜歷日

趙南塘

欽崇天道有嚴占步之司敬授人時爰啟析因之序不
忘遠外均被榮懷恭惟皇帝陛下侔德上圖儲精太始
誠心感格按星土以辨方和氣薰蒸調雨暘而應度叶

用五辰之紀聿觀庶績之凝臣敢不廣布主恩益共乃職察藏蓄而預備用阜民生省耕斂而不違俾知帝力

謝宣賜歷日

趙南塘

堯歷誕頒式重授民之制夏時謹始咸均正朔之加拜賜為榮撫躬知愧恭惟皇帝陛下妙叅元化道育羣生閏月定四時靡差纒度三農生九穀庶保豐穰爰錫成書以開嗣歲臣敢不恪共乃職廣布上恩夷隩析因勿奪人為之序作訛成易罔知帝力之深

謝賜歷日

應松湖

課密清臺孰測調元之妙詔頒紫禁舉知作事之經恪
侯度以遵彝聳神工之更始陛下甄陶神化橐籥太和
歲會攷成惟日月時無易天心克享烈風雷雨弗迷布
令明堂賜書方國臣叨承眷渥欽奉寬條議貸和春豈
但遂草木羣生之樂授衣流火惟思謹農桑七月之詩

御書

謝賜御書張九齡千秋金鑑錄故事

真西山

節值千秋輒獻芻蕘之論恩放一札獲瞻奎壁之光俯
拜難勝襲藏有耀伏念臣慚無寸技幸際兩朝昔瑞慶
方臨嘗豫陳永命之戒今天基甫屆敬復摠曼壽之言
蓋謂絲囊效貢之徒勤不若丹扆獻歲之有補經幃入
侍天語垂褒觀惓惓進說之辭知惓惓愛君之意既下
軒墀之拜甫還蓬藿之居賜雲章一人幾類邇英之故
事上金鏡五卷有取開元之爭臣不圖螻蟻之微驟覩

龍鸞之妙茲蓋恭遇皇帝陛下性全淵懿學懋緝熙博
攷舊聞審萬古忠邪之判緬懷遺直係一時治亂之分
爰洒宸毫以勵臣節臣猥繇愚拙誤沐褒嘉百祿是宜
敢第述商頌降生之瑞三宗可法願益遵周書無逸之
規

謝賜御書常武詩

方秋崖

於赫王師整我修戎之政倬彼雲漢有嘉立武之章昭
聖訓之丁寧寓神毫而申飭

中謝

臣曩欲驅馳於斯世

蓋嘗復熟於是詩竊以為天生五材雖治不能忘戰武
有七德於文則為止戈其曰因以戒然亦殆有所謂矣
味匪紹匪遊之旨繹不畱不處之辭知王者不嘉兵維
陳行而省徐土惟蓋臣能弭患邇執訊以鋪淮瀆故六
師曾不淹時而三事為之就緒必有程伯休父之輩克
成周室中興之功臣實何人敢當此賜茲蓋恭遇皇帝
以昭回之光飾萬物以溫柔之教行三軍修政事以攘
夷伊欲皇威之振遣戍役以守國用勤奎畫之垂仰止

卷二十三
驚翔第從驚劣臣敢不賢為大訓誓報殊恩匈奴不滅
何以家為敢憚東征之役王事多難維其棘矣覲寬北
顧之憂思不負於先王第無忘於名牒永言忠激臨發
涕零

謝賜御書太學崇化堂武學立武堂牌

方秋崖

文武未墜於地久恢兩學之規雲漢於昭于天肇啟千
齡之遇寶軸下宸奎之四榮光勤宵雅之三
中謝竊以
國家疊矩重規左庠右序寫諸琬琰覃膺思於孔聖之

經炳若丹青御神毫於樂毅之論皆極一時之崇獎未
如今日之表章踵堂者八十餘仰東壁日星之照園門
盖億萬計拱北辰翰墨之輝諸生如近於帝尊百世難
名於道化此盖恭遇皇帝神文經緯聖學緝熙崇化而
風四方親接素王之統立武而有七德聿思大老之歸
乃肆筆以成書粲在天之垂象振古未有惟帝為能臣
等適列虞庠恭承義畫昭回之光下飭誕揚為鐸之聲
咫尺之威不遑更繹止戈之義

御賜

謝賜衣帶

方秋崖

恩言狎至聿高鳴玉之班命服斯皇更佩環金之飾有

華枯朽難稱榮光

中謝

伏念臣家本綈袍起從韋帶半

生貧苦誰憐身世之寒一念難虞久覺腰圍之減分歸

尋於短褐何堪繫於精鏐散意微軀存叨誤渥此蓋恭

遇皇帝陛下仁足以衣被四海智足以約束羣才文帝

親御弋綈盛德蔑加於恭儉光皇自解佩綬茂恩不替

於賢能乃錫身章於昭眷賚臣敢不書紳圖報東社懷
慙又改為兮不嘆無衣之七亦足敬也庶逃終褫之三

謝賜衣帶

黃竹坡

官嚴三服寵分在笥之珍金列九環增賁垂紳之飾恩
榮下逮愚陋難勝伏念臣韋布諸生冠裳末緒衣既敝
而予改徒望前賢帶不下而道存第遵往訓敢意身章
之飾鼎來官服之間受再命以疏榮俾知安吉圍萬釘
而在列稍異觀瞻臣敢不飭已惟屢提身加謹解而衣

我敢忘報上之誠東以立朝益勵匪躬之節

謝賜冬衣

黃竹坡

日月麗天肅氣潛回於幽律衣裳在笥匪頒爰及於周
行負輕一毫恩重九鼎

中謝

恭惟皇帝陛下裁成二氣

覆冒羣工車服所彰不稱詎容於赤芾賢能是好改為
寧客於緇衣深虞無褐以禦冬勿使索裘於已晚幣頒
內府寵及外庭臣等敢不佩服光華緘藏恩惠當令軍
士共懷挾纊之恩亦使將臣同勵解衣之賜

謝賜玉帶

代嗣秀王

應松湖

璿源衍慶猥超裂地之封瑤陞分珍濫沐通天之渥焜
煌下照偃僂難勝竊以寶王之展于親允嚴國典肇厲
之昭其數莫重負章緬攷青編無如蒼錄麟經紀傳夏
璜特畀於魯公馬史垂芳衛寶併貽於康叔雖侈瑰奇
之賜未聞佩服之華疇若熙朝誕加殊寵如臣者瑣才
如綫鑛質多瑕翠琰颺徽綴洪支於綿帙黃金襲印奠
樵李以苴茅外洽溫如之仁內積悻兮之警切磋無玷

愧洪輿之文章被服有儀謝河間之儒雅敢萌異數誤
逮微蹤攸一札於中宸璽書璀璨出萬釘於內府瑤彩
陸離鼎來圭璧之輝賁及砮砮之陋恩光有爛絢寧王
紅玉之明屬籍本踈邁衛公于闐之賜締觀虹璞深覲
鵜梁陛下縝栗篤親粹溫睦族宗英追琢俱粲然其可
觀磐石藩維豈垂之而如隊種西崑之羣玉表東平之
十園晶熒盥綬之傳照映翠綏之飾獨羞驚鈍上玷龍
光臣敢不磨勵一心戰兢三褫韞而藏諸匱亶逾褒袞

之榮束以立於朝敢替書紳之戒

謝賜衣帶鞍馬

黃竹坡

惟筭分珍爰飾精鏐之煥在垌輟馭更盼沃轡之華恩
寵荐加屏愚曷稱伏念臣學裹無補晞驥未能州縣徒
勞第戒繭絲之刺功名寢晚敢貽韁璫之譏頃沐聖知
荐汚朝著豈謂真除於近列更蒙例賜於瑰竒安且吉
兮表致身於官服非敢後也使策足於榮途眇然庸虛
冒錫寵渥恭遇皇帝垂裳御統市駿求才好賢如鎢衣

深念敝予之意臨民若朽索洞明馭下之方丕赫寵靈
有華衰晚臣敢不掃除溫飽之志鞭策駑鈍之資束以
立朝要使可言於賓客縱而之道或能有補於驅馳

謝賜衣帶鞍馬

劉後村

蕪辭奚取掌中禁之絲綸殊渥有加輟尚方之服御寵
綏攸速捧戴冒勝中謝伏念臣縑縷寒蹤虺隤暮齒向

也錫之鞶帶竟招三褫之尤政惟範我馳驅未有一禽
之獲敢圖朽質復玷恩光茲蓋伏遇皇帝藩飾治功攬

収威柄解衣以待士尤感於招徠持策而臨材一歸於
駕馭不然衰悴曷致輕肥臣綿力雖疲丹心猶在願言
補袞輔時政之闕遺未忍執鞭求此生之富貴

謝賜衣帶鞍馬

方秋崖

襲衣寶帶有覲梁鵜條革鏤錫更分厩駟於縵服乘之
賚何知俯僂之蒙中謝伏念臣寒故戀於綈袍駕不堪
於羈勒矍鑠哉是翁也老矣奚為逢掖者儒服與退然
何有每念牛衣之泣卧居慙馬革之褱歸敢意寵光榮

茲衰朽此蓋恭遇皇帝藩飾百度鞭笞四夷武王之一
戎衣將輯寧於華夏文帝之千里馬必駕馭於英雄顧
惟何人亦攸異數臣敢不曳婁圖報奔走服勞要之裨
之好人服之第乏彌縫之用瘡矣痛矣云何吁矣恐貽
負乘之譏

謝賜衣帶鞍馬

真西山

翰苑詞林方對渙恩之渥尚方天廐至驚晉錫之蕃際
遇何功服乘有耀

中謝

伏念臣少無緣飾老益虺隤衣

敝縕袍冀無慙於季路御款段馬竊自慕於少游豈圖承乏於鑾坡猥獲分珍於玉陛鵬錦之文煥爛申以七環龍媒之骨權奇華之六轡茲蓋恭遇皇帝陛下服惟命德爵以馭臣念其跨清切之班故伴冒輕肥之寵舜裳五色慚微裨補之長燕駿千金願廣招徠之意

御劄戒飭不許進兵謝賜金器 方秋崖

與宸奎於瑤札備極丁寧出御府之珍奩更加申錫予以軫憂邊鎖予以增重帥藩祇誦堯言曷勝周賚中謝

伏念臣賴先臣之忠教敢際上聖之殊知適當亡寇之初凜有鄰韃之懼比連衡於襄邇欲進扼於潼關一臂不隨班征苗之師而憾無及衆口可鑠錄追戎之罪而死有餘惟炳然丹許國之衷歎老矣白憂時之髮秋防又逼夜寐靡遑用勤雲漢之章倣備風寒之虞天子明見萬里訓辭切中於事機有道守在四夷經理實關於世運夫何遭遇重以匪頒此蓋恭遇皇帝以造化為心以天下為度糾糾雄斷丕昭對璽之恩洋洋聖謨密授

釘金之略永惟出綽寧勿書紳臣謹當奉以周旋務為
持重不謂進無敢進尚思固圉之謀置諸安則為安毋
忘賜器之日

謝賜銀合夏藥

代江西衛帥

李梅亭

疾服剖符敢憚熏心之暑恩綸分寶載放苦口之良暝
眩用瘳鬱陶有忸

中謝

伏念臣初無善狀洊守雄藩去

湖即江漸近尊鱸之境玩歲愒月甚慚竹馬之童氣方
溥於伏庚恩忽疏於令甲鼎丹分餌鑒白作奩南土爾

居自乏雙金之貢西山無極猥瞻五色之光茲蓋伏遇
皇帝陛下動惟厥時予馭其幸涼生殿閣每思雲漢之
側身地接衡廬更虞山藪之藏疾速置郵而傳命隆體
貌以勵廉臣敢不謹視一人之仁各思尺寸之愛

謝賜夏藥

劉後村

聞寄無功載履炎衡之序驛馳有詔肆頒尚藥之珍稽
首拜嘉拊心知愧中謝伏念臣初無遠略誤總中樞臥
護壺頭敢發墮鳶之嘆躬馳塞上粗親汗馬之勞曲荷

淵衷俯稽暑令，奩實節宣之劑，璽封披拂之言，茲蓋伏
遇皇帝陛下，丕赫軍容，密延國脉，謂連營暴露久分邊
面之憂，雖廣內高寒，尚軫人間之熱，故加錫予用，示眷
憐臣敢不祇服，寵榮力扶，衰懦上推德意，同戰士之苦
甘下廣仁風，問蒼生之蘓息。

謝賜銀合臘藥

代湖南衛帥

李梅亭

細書賜郡正臨大蜡之辰，上藥放庭，就賁中金之器，拜
承恩旨，頓失寒顏。中謝伏念臣假守蠻荆，馳心象魏，賜

金所以褒循吏愧治狀之蔑如和藥所以活功臣慙勞
能之無有歲忽忽而適盡皇剌剌以揚靈珍薌芬馨似
出蓬萊之采錄奩焜燿有光蘭菊之華茲蓋伏遇皇帝
陛下加惠舊臣寵華遠服念長沙之濕河魚之疾柰何
飲上池之清廐駒之病起矣臣仰體好生之德誓殫盡
瘁之年

謝賜臘藥

劉後村

歲華紀臘愧頗聞之素餐詔語如春錫尚方之珍劑寵

綏攸逮捧戴難勝

中謝

伏念臣薄技易窮孤忠自信邊

城傳柝僅能護於風寒戰士荷戈恨莫同其甘苦屬當
凝凜上軫眷茲函封一札之文奩貯萬金之藥茲蓋伏
遇皇帝陛下博求利病勤拊瘡痍念王事之獨勞不遑
寧處慨君子之于役如何勿思肆頒服餌之良俾竭馳
驅之力臣敢不堅凝晚節銜荷天恩君賜必嘗既切康
寧之福民勞小愒盍思蘇息之期

翰苑新書後集上卷二十三

欽定四庫全書

翰苑新書後集上卷二十四

謝表

內除

謝宣召

真西山

來從南服未宣民政之勞名寘北扉猥被宸綸之寵光
生里巷榮動簪紳竊觀列聖之用人惟待詞臣而加禮
蓋於言語文章之外責其論思獻納之忠或雖忤旨而

暫開終必棄瑕而復用修除翰苑在環滁出守之餘軾
侍禁廷亦赤壁歸來之後豈非加歲月則其文老涉變
患則其慮長乃登遷嚴以備顧問如臣者才華弗競慙
拙自將掌先皇內制者六年每慙越俎迨陛下初元之
再命竟許循牆以驅馳州縣之頻且放廢山林之久見
聞寢少藝業益荒結茅屋於雲邊已甘終老瞻玉堂於
天上若隔前生敢云白首之重來誤辱清衷之親簡獲
玷久虛之選幾成三入之榮茲蓋恭遇皇帝陛下肆筆

成文解紆更化志孚羣聽欲下山東之書念在遷磨或
訪河西之事必有端良之彥以充供奉之班奚取臣愚
俾承人之臣敢不益堅晚節思答隆知賜宮錦而嘉草
詔之能雖非敢望即金鏡而摘任賢之要知所自期

謝除學士

劉後村

視相如之草既趨侍於鰲扉讀倚相之書復進陪於虎
觀寵光特異慙懼交深伏念臣猥以鯁生奮於下土少
而掌制曾莫施潤色之功老矣談經冀有補緝熙之學

人或譏其迂濶上獨察其樸忠迹似牧之方一麾於江海才非應氏乃三入於承明當九重新政化之初而兩制極文章之選鴻筆固資於摘掇鯁言尤賴於論思歷攷名臣具存故實陸贄於詔書之外每上奏篇歐修雖帖子之微不忘規諫臣何為者心竊慕之茲蓋伏遇皇帝陛下湯德又新堯文有煥震雷劃地蟄蟲各動於真機杲日中天螢爝奚施於末照顧容孤士濫長禁林臣敢不圖報隆知勉殫薄技念官為學士豈無時政之可

言倘號曰私人則匪微臣之素志

謝除內翰兼侍讀

真西山

天子重儒臣方恢文治翰林逼華蓋遽冒恩光兼陪勸講之聯曷副選掄之意

中謝

睠唐室之崇內相至號私

人惟聖朝之得臣脩名真學士豈獨文章掃五季之陋抑亦論諫有四賢之稱凡厥封囊具陳時病至於舉筆猶寓忠規懷哉若人允名世伏念臣愛君有素典誥非常曩自中秘書久攝承明之直晚繇太常伯躡升供

奉之班伏觀內史錫命之詞專舉至和得賢之美顧改
元更始雖歲月之略同而為官擇人則材能之實異一
字之褒大寵千鈞之重難勝茲蓋恭遇皇帝陛下寅畏
克對於天心恭儉一如於仁祖砥平諸夏式圖大競之
勲畦種羣賢將侈無窮之用故雖庸瑣亦汗凝嚴臣敢
不刻意斯文勉肩所職變節章繪句之習豈薄技之能
堪以救時行道為賢尚前猷之可仰

謝除禮書兼學士

周必大

宗伯綴文昌之座已高曳履之班翰林依華蓋之星向
玷演綸之直當聖王謹持於公器獨遇臣常愧於私人
臣竊考自古豪英之才旋觀當今文學之士或抑厭草
茅之下或陸沉州縣之中瞻城南尺五之天致身無路
想玉階方寸之地通籍幾人況乎出入禁嚴周旋侍從
論思獻納日邇清光衣被服乘歲叨微數向匪負一時
之望安能符衆論之公如臣者學不足以知方才不足
以應務家壁四立甘為窮陋之民君門九重敢起躋攀

之念而臣親逢聖作首奉詔除簡知特厚於儒臣獎擢
徧更於華貫官益崇而效寡祿愈富而報微左降固宜
右遷何有恐拜便蕃之命疊加優異之恩帥屬春官光
貳卿之舊次摘文禁苑添四命之新榮煥寶帶以章身
飾繡韉而華駿正使實兼數品尚虞稱塞之難矧伊初
乏寸長何意超踰之甚周章就列俯仰懷慙此蓋伏遇
皇帝陛下道協舜華志恢禹迹明明在上雖洞照於羣
情浩浩其天每包涵於萬類寧稍捐於爵秩恐或棄於

非封遂致凡才亦塵顯仕臣敢不悉其思慮稱是寵褒
號令文章期助漢家之制討論潤色勉晞鄭國之賢苟
這素餐豈疇玄造

權戶書謝

真西山

十連竊寵愧藩閫之罔功一札遄歸叨地官之晉長班
躡陪於踐斗懼深重於履氷伏念臣素守樸忠濫膺迪
簡曩被初元之召首躋邇服之榮自退屏於山林浸逃
違於軒陛憂時之髮益白恨去國之十年戀闕之心如

丹敢忘君於一飯間蒙起廢再玷承流阜蓋分符種復
還於舊物青冥授鉞繡行忝於故鄉曾坐席之未溫忽
賜環之已及方躬攬宏開於公道而彙征畢萃於羣賢
敢圖孤迹之漂流亦辱清朝之記錄且民部周司徒之
任豈惟稽戶口之版圖顧尚書古納言之官蓋實專喉
舌之樞要誤拜演綸之渥冒陞曳履之華退省驚疲曷
勝蚊負茲蓋恭遇皇帝陛下乾剛天健畜德日新親庶
政以勵精大明黜陟臨百官而昭德洞別忠邪念臣嘗

參紫橐之聯知臣粗勵素絲之節趣還近綴俾侍清光
臣敢不期稱隆私勉堅初志生財有道雖慚源流本末
之知事君非欺願竭獻納論思之效

除刑部尚書謝

方秋崖

祈父王之爪牙久負臨邊之寄尚書國之喉舌遽塵司
憲之班懇避無從叨踰已甚臣竊以班固志刑法兼存
兵甲之繕修臯陶作士師曰惟寇賊之姦宄蓋二者相
為於表裏而四夷正賴於鞭笞乃洛分相之臣與聞司

臬之事繁此責則重矣非其人而謂何伏念臣受國厚恩遭時多事當其南牧既不能折遐衝以寢敵謀戒爾西征復不能殲羣醜以敵王愾維蛇豕之宵遁尚狐兔之畫噪奚有微勞肆茲懋渥此蓋恭遇皇帝以并包立皇極以懲勸興人心謂賞僭及淫固難私於八柄然功疑惟重顧何愛於一官遂令孤外之蹤亦玷文昌之選臣敢不相為嘗膽獨有捐軀屈突通不習文已莫辭於憲部馬伏波雖已老誓當死於邊城

除兵書謝

楊茨野

地當太白莫宣帥閫之勞官冒文昌仍忝官僚之選戴
洪私之優渥揚小已以徊徨揣分踰涯懷慙非據竊以
六卿分職屬嚴兵政之條明萬國本元須賴賢才之輔
翼其責甚重匪人則輕伏念臣蹟起孤生家餘樸學早
由州縣而平進甘處常流繼蒙朝廷之誤知遂塵法從
旋拜恩於天陞俾承乏於坤維鎮安人心焉有方平之
智略裁制事變復無張詠之威名第思自竭於一時敢

憚遐征於萬里神馳北闕長同江水之朝身在西州莫
致雪山之重頃荷宸旒之異眷峻陞寶閣之崇資虛辱
褒嘉曾微稱塞六年去國弗遑夢寐之寧百念嬰懷頓
覺形容之改茲趨嚴召得遂生還文石再登遽躡五兵
之掌承華重到切同三令之班兼三任以奚堪凜寸心
而殊悸況力不待年而衰減而心因慮以耗傷縱勉強
以難勝惟凌兢而退避甫徹愚衷之懇款重勤睿旨之
丁寧渙汗莫回震驚無措茲蓋恭遇皇帝陛下燭照四

海器使羣工知臣艱險之備嘗賜之收擢憫臣蹤跡之
久外假以寵光但虞謗薄之小材曷受便蕃之異數臣
敢不誓堅晚節愈勵壯心儲被悉諳雖愧姚崇之強記
衣冠有偉敢陪綺里之清遊

除禮侍謝

真西山

龍飛九五幸逢真主之興驛召再三俾造邇臣之列職
親地遽恩鉅人微臣竊惟國勢之重輕率視人材之聚
散王多吉士則若鳴鳳之集梧桐朝有直臣則若猛獸

之衡藜藿和聲聞而妖聲自息正氣勝而邪氣罔于是
以元祐首年盡起諸老隆興初政畢萃羣賢正途既開
治象可卜於赫盛旦適追先猷宜得白首耆艾之英以
重清時獻納之選伏念臣學雖志道材弗渝人忝一第
於慶元臨軒之初綴三館於嘉定改絃之始鰲扉久直
曾微華國之文螭陛屢前徒抱愛君之志越從予節存
易守藩尚期宣室之席前忽痛鼎湖之弓墮義輪東出
方溥海之仰瞻漢札西來先時髦而收召身未登於詞

掖班已躡於儀曹金華玉堂假儒臣之榮寵蘭臺石室
窺太史之秘藏自惟何人叨此殊獎茲蓋恭遇皇帝陛
下德全純懿學務緝熙念皇天后土之鑒臨居懷兢畏
察君子小人之消長實兆興衰謂臣雖無適用之材知
臣粗有勿欺之節擢躋邇服許貢微忠臣敢不戒在苟
容期於美報惟禮可以為國願廣晏嬰之言非道不敢
陳前竊效孟軻之敬

除吏侍兼給事中謝

真西山

貳卿之職尤重於天官兩省之班特高於少拜榮甚九重之擢揚渝數器之陳伏念臣早忤貴權晚逢親政每謂永嘉之末無復微言不圖貞觀之初樂聞直諫旋繇烏府擢拜鳳池雖弗居擊搏之官猶欲舉封還之職然而精神未能感悟議論無所建明車轉轉馬蕭蕭苦口莫回於輕舉印累累綬若若病軀徒愧於久留屢闔戶以抗章亦扣墀而還笏未拜玉音之俞允反蒙御筆之超除銓部文書猶章程之可守銀臺封駁豈風力之克

堪而況翰苑詞林經筵史觀名臣森列柰何越俎而代
庖高位疾顛實恐負乘而致寇上無以稱答蕩蕩乾坤
之造下無以慰塞悠悠風塵之談祇服寵榮倍深憂畏
茲蓋伏遇皇帝陛下舜風旁達堯哲周知蠱壞一新更
膠柱不調之化福威自出收太阿倒授之權察臣無黨
援之私冀臣有論思之助臣敢不深維簡在益自勉旃不改丹
心常若端平之初節勿汙青史庶為元祐之全人

謝兼侍講

真西山

執法南臺冒司雄劇侍經西學猥玷清華深慙問辨之
卑無補緝熙之盛拜恩寵甚拊已缺然惟聖朝經遠立
國之模得先王董正治官之意謂臺綱雖止於法律而
治原實本於藝文蓋排擊是非僅救正於已行之後而
研精經籍將圖回於未發之先故令言事之臣俾預經
筵之列立法如此擇人可知伏念臣性本顓蒙學有疎
略窺陳編而浩歎莫涉津涯讀聖人之遺書僅存糟粕
敢奉清閑之燕以陪誦說之班茲蓋恭遇皇帝陛下取

法兩儀潛心三聖謂易無思不動曲盡彌綸惟學厥修
乃來敢忘鑽仰肆令宏博之彥共究精微之書如臣何
人亦冒茲選臣敢不仰祇聖訓俯究師承庶通三畫之
靈盡屏九師之異觀天文察地理豈惟形象之占內君
子外小人益廣忠邪之辨

勸講轉

東宮講春秋謝轉官

孫養浩

虎闌勸講曩叨入侍之華麟史徹章猥預賞勞之典拜

恩優渥撫已凌兢竊惟四繫之書昭著一王之法筆削之旨經聖作而乃公疑信之傳迨世遠而益甚洪惟昭代興起斯文當諸禁之清閑萃儒先而講繹如臣不敏濫職其間褒貶之嚴豈易發明於千載誦說之外安能俾益於多聞矧惟元良夙稟岐嶷得師自己陳五傳以奚疑求益於人愧一辭之莫措豈伊誤寵遂及罔功恭惟陛下聰明憲天法度稽古建立國本因圖萬世之安遴選官僚分繹一經之趣迨今累月甫奏終篇靡拘官

守之移例沐恩章之錫臣敢不勉思自竭期稱所蒙職
在祥刑雖司存之已異心知許國誓忠報之不移

知貢舉謝

謝御札戒諭知舉以下

真西山

禮闈程士慙無冰鑑之明宸扆崇儒煥有奎章之賜丁
寧備至震越靡皇惟本朝設科以來視前代得材為盛
自頃人心之銷蝕浸令文氣之澆浮號明經者涉獵而
莫探其原稱能賦者雕鐫而或昧於聖不圖今日復返

古風恭惟皇帝陛下躬攬權綱思皇多士菁莪在治已
彰樂育之能采芑于田益昭新美之意爰顯敬於詔旨
俾精攷於賢書要觀器識之宏匪徇詞章之縉龍翔鳳
翥昭回飾物之光魚躍鳶飛鼓舞作人之賜臣等祇承
明訓恪謹守司崇雅黜浮期復唐文之盛論秀升俊庶
幾周道之公

謝御札戒諭知舉以下

方秋崖

思皇多士俾呈甲乙之科遐不作人誕布丁寧之訓昭

回雲漢飛躍天淵臣等洪惟國家有道之長進士得人
為盛崇雅正黜浮誕悉繇鑒裁之精先器識後藝文豈
但度程之合故以忠厚之論則有若臣軾以混成之賦
則有若臣曾蓋主司既擇於名儒宜貢部不孤於隆旨
豈伊臣等可稱上心此蓋恭遇皇帝恩格至平敷求哲
又方政化更而賢路闢通觀厥成既俊良登而治具張
無競維烈用勤肆筆申飭持衡臣敢不仰揆宸衷旁搜
衆彥鑿鑿乎如穀粟之用斯謂實才炳炳焉若日星之

垂敢忘明詔

謝撫諭詔書表

劉後村


敵渝信誓爰興細柳之屯帝有恩言申念采薇之戍命
傳急驛散動連營

中謝

竊以邊馬南侵謂齊盟之可棄

王師北伐乃大誼之當然由聖朝每示於包荒故敵國
敢從而干紀一自天申之震果令賊膽之寒始欲肆於
鯨吞俄已聞於星散伏念臣誤當閫寄實董戎輶所惜
者可為之事機所憤者不雪之讐耻傳檄而英豪丕應

調兵而將吏無譁義士出奇誠首渠而獻捷遺黎效順
舉城邑以願歸國勢既尊人心咸奮我疆我理方期舊
境之復還靡室靡家尚恐征夫之況瘁植驕陽之蘊暑
拜溫詔以如春茲蓋恭遇皇帝陛下剛與時行勇由天
錫謂戎車四牡久暴露於邊頭故細札十行示激昂於
士氣蕩然發號聞者屬心臣敢不肅奉睿謨徧孚羣聽
拊循意切豈惟感動於武夫滲漉恩深尚有願觀之瘖
老



翰苑新書後集上卷二十四

欽定四庫全書

子部

翰苑新書後集上卷二十五

六

詳校官中書_臣康綸鈞

主事_臣祁韻士覆勘

總校官知縣_臣楊懋珩

校對官中書_臣邱桂山

謄錄監生_臣唐澐

欽定四庫全書

翰苑新書後集上卷二十五

謝表

謝外除

除樞使兼知政事督視軍馬

方巨山

假鉞而督諸軍曾微威望進班而聯二府有覲恩徽制
書不許於辭難任事凜如於履薄

中謝

臣聞自昔艱難

之會聿求經濟之材使盡護於戎昭用借籌於廟勝故

能出入將相注意安危內外修攘文武兼資學力則有
若臣浚之剛大智名則有若臣鼎之高明必維斯人殆
稱主意如臣者器不足以堪時用才不足以燭事機仲
淹胷中之百萬兵何能為役富弼河朔之十三策多見
謂愚徒以父教之忠仰賴聖治之誤遂躋兩地倏粵再
朞適軍符飛羽之秋敢安駕劣顧幕府重師之任曷稱
鷹揚茲蓋恭遇皇帝旋轉乾坤輯寧海宇非賢罔入謹
一日萬幾之微無競維人幹三軍五兵之運肆令愚陋

張我皇威臣敢不遵奉明謨布昭聖武惟當鞠躬而後
已其責在臣若夫成功則不知惟天祚宋

樞使督視兼知建康府

方巨山

峻班宥府出董戎旃宅牧陪都併司宮鑰遡炎蒸而于
邁覲憂顧之少寬遡次軍門具宣廟算臣聞應事變者
不遑寧處視師征者焉有定居願長江合上下之流風
寒非一惟鍾阜據東南之會形勝猶存俾於此以建牙
殆猶身之使臂仰切明謨之指授孰堪多事之驅馳有

若臣愚寧逃淵鑒意者乃聖乃神之英主方析箠而撻
四夷雖以不文不武之具臣可授鉞而護諸將肅將帝
命已視師于茲蓋恭遇皇帝獨斷睿謀兼收羣策謂明
威可畏詎容蛇豕之妖今厄運當銷自應佛狸之識顧
如臣等足辦邊防臣敢不夙夜靡遑東西于役縱無遠
見料軍容萬里之情豈乏孤忠運帷幄一籌之勝

鄒給事除潭帥

李梅亭

撫桂筦之封了無善狀謀荊潭之帥又玷恩除晉遽直

於奎文蒙趣行之璽命循墻靡獲問路疾驅俶見士民
虔宣德意伏念臣賦材不腆取數已多青瑣追隨日何
裨於三接朱轡旋轉星坐閱於一周未滿戍於池陽尋
改轅於嶺表徒守無華之悃愾曾微可紀之功名願將
母以投閑幸蒙恩而受代詎意升班於文閣復令分閫
於武安惟長沙千里之平寄隆岳牧而洞庭九州之大
責重藩垣前此委兩社之間否則取六官之長詎容謏
薄猥備使令茲蓋伏遇皇帝任官惟賢試臣以職大懷

小畏封疆已復於東秦近悅遠來保障仍先於南楚俾
承嘉惠往撫疲氓臣敢不祇遵教條明將惠澤材全而
能鉅難希開鎮之楊憑功少而勢踈願效稱忠之吳芮

郭帥謝到任

周山房

銜命睦鄰慨神臯之未復叨恩分閫愧將畧之非長屬
立表之有期恐循墻而莫避輒趨營塢謹視印符伏念
臣五世逢辰三朝綴仕始由涓贊誤簡淵衷列衛諸才
竟負阜陵之殊遇屬橐入侍旋陪文陛之信臣既中外

之屢更亦偏裨之游歷竊掛弓而圖報尚橫草之末酬
每思鳳翔勲伐之旌猶藏盟府及讀馬革死邊之傳恐
墜祖風數戰閱以無多詭州麾而自試方候戍葵之次
敢圖細柳之行惟秋浦之上流控長淮之一面地形峻
峙前瞻廬壽之戰區天塹橫陳中節荆吳之聲援邊烽
久息家累日增非深識兵勢之人孰當警急欲少賈敵
場之氣尚費拊循藐下臣而無聞冒中權而有懼陛下
博收戎佐靡間位名既分宿望以責成猶欲後來之輩

出知臣雖乏汾陽之貴氣謂臣久聞隴右之家聲因其能忠謹以自將遂假以事權而躡授臣敢不勉思跼注載緝犀渠志在死綏雖未得犯難忘生之所師如挾纊當使有捐軀徇國之心倘尺寸之幸成庶涓埃之少答

潼川路安撫到任

方鶴山

王三錫命誤新渥於松階國十為連忝舊封於梓部莫俞巽牘敢後寅車伏念臣才不適時學惟事道際遇兩朝之久踐揚三紀之間為詩遺王名曰鵠鴉本期救亂

取彼諧人投畀豺虎遑恤憂讒尚憑高廟之神靈更賴
天王之明聖返湘纍之初服釋楚繫之南冠訖俾生還
誓言死報矧又授鉞於赤甲白鹽之下予麾於玉堂金
壁之間猶未厭於宸心復游頌於閭寄地連巴益分四
千石虎竹之符江接牂渝理十六載龜琴之夢維時多
故歷變方新民夷有侏儒擾雜之難齊郡國有赤子龍
蛇之未定而民力張弓之莫弛邊氛煽燎之方揚豈惟
鵜在梁之羞抑亦蚊負山之懼厥惟冒忝實出會逢茲

蓋恭遇皇帝陛下德歌九功明見萬里暢皇威於海岱
允矣東漸汙廟算於岷嶓瞻焉西顧謂南維之絕徼寔
北定之良圖念及微忠復加隆委臣敢不修其可願欽
乃攸司銷帶牛佩犢之風導之務本堅使馬如羊之誓
廉以安邊

江東漕到任謝

真西山

兩螭夾峙久點近班四牡載馳叨分劇部假中秘隆儒
之寵為外臺將指之光望過所期感深以惕伏念臣材

非適用幸有逢辰屬漢庭更化之初首唐室登瀛之選
金鑾夜直承密命者六朞玉陛晨趨對清光於再稔凡
吮墨濡毫之任皆振纓裁弁其間吏責旣稀願優繇於
近列生恩未報應眷戀於本朝其如親闈喜懼之年當
謹人子溫清之職輒援公輔辭翰林之請庶幾潘岳奉
版輿之歡分太守之符曰需成命出少府之節遽冒殊
恩懷章而過軍門閱宿而臨封部敬卜中和之節重宣
寬大之書輶傳初馳旄倪爭覩謂朝廷所以輟柱下之

史蓋聖主將以惠江左之民因博採於風謠頗究知其疾苦以垂罄之家而困追需之目以屢豐之歲而多流徙之人官無足證之簿書里有難平之徭役文移星火不勝胥史之誅求牒訴丘山半為租賦之煩重興言及此勿救可乎輒彈朝夕之諮諏兼可公私之緩急賦難遽省盡漸捐賦外之征民未易蘓當先去民間之蠹切自量其縣薄恐終負於選掄茲蓋伏遇皇帝洪造曲成大明博照念臣志存將母俾獲便於旨甘念臣學本愛

人欲稍觀其政事肆加遽職仍畀重權臣敢不以阜俗
為阜財之方以悅民為悅親之本灌輸所仰媿無鞭算
之能樽節是先敬佩玉音之訓

成都漕到任

李梅亭

守墓願之江鄉罔功攸御用龍節於澤國受命將輸忱
辭方切於循墻便旨必令其叱馭驅馳非據踰踏知慚
臣切惟大學生財義利是辨小雅遣使忠信為先顧在
衍魚鳧實為狼狽粟非天雨古難轉粟以上天錢不鬼

輸今豈有錢而使鬼必盡諏謀咨度之智斯知疾舒衆
寡之源伏念臣實不中聲學未聞道去國十暑久違閭
闔之風起家一寒再戍蓬婆之雪誤連四千石之重初
乏萬分一之功豈圖由列雉之城就令濡四牡之轡輕
車熟路敢言周道之逶遲數畧洿池適值益州之疲弊
外欲給貔貅之任內當閔鴻雁之飢此豈駕材堪任驪
駕茲蓋伏遇皇帝明見萬里聰冠群倫凱未北旋軫岷
峨之悽愴眷深西顧急江漢之經營肆令芻狗之陳叶

濟天人之運臣敢不謹身率吏節用使民穿窬無羞惡之心當奉六條之察登攬有澄清之志庶幾一路之安

湖北憲到任

王格齋

剖符起廢已媿僥踰持節觀風又叨臨遣星言于邁夙次所臨伏念臣草芥人微斗筭器小紳笏二十載何有寸功風波千萬端止欠一死曩丞棘寺出守山城讒言驟興政坐過客厨傳之故公論既定復見中天日月之明方拜命於州麾忽䟽榮於使指惟是重湖之外實連

三楚之區民雜蠻徭地控邊鎖渺焉蒲澤之深阻甚者
潢池之繹騷自非酌寬猛之宜是必負澄清之寄有如
抗拙曷稱使令茲蓋恭遇皇帝陛下蹈舜好生傳湯祝
網欲妙按臨之選以將欽恤之仁謂使過賢於使功將
觀後效而聽訟不如無訟何必能聲臣敢不循行郊原
延見父老道上德意俾各懷自愛之心問民戚休勿使
有多暴之俗

湖南倉到任

劉後村

郡紱久紆拙勤無補使華就遣簡記有加引避弗俞冒
榮滋愧臣瞻言湖外越在楚南綿地廣故民瘼難知去
天遠故吏奸易肆必藉褰帷之詢訪庶寬負宸之顧憂
如臣者起自寒儒見稱樸學方其盛壯久沈常調之中
及此暮衰始踵英躔之後甫離鴈序旋守鴈峯芻牧之
心惓惓至切繭絲之計斷斷不為閱下考之再書迫偏
親之大耄方謀詞廩猥建康臺惟熙寧創置之嚴況嘉
定選除之遴旣慙材薄復恐望輕卿典偏州尚拊循之

可勉令廉一道豈罷軟之克堪茲蓋伏遇皇帝陛下加
惠黎元勵精政治博求忠信俾咨原隰之間一視遐荒
若處畿甸之內顧容駑鈍亦忝馳驅臣敢不宣布詔條
推原德意雖無風采令山岳之動搖尚竭心思訪閭閻
之疾苦

林奎部謝除浙西倉

陳寅

飛龍天上正籌膚使之良駕壯日邊猥及漫郎之陋足
馳驅而易徧力負荷以難勝敬稟廟謨恪趨臺治伏念

臣江湖墜緒庠校下陳早歲激昂亦有癯儒之志中年
淚洟幾為俗吏之歸惟先皇加惠於草萊雖一令亦塵
於葑菲自貳以守繇丞而郎洎傳風木之悲復玷握蘭
之寵光靈過矣報稱缺然正思返實於丘園詎意升華
於原隰睠言右浙寔號內畿煮海蕭疎徒作鯨波之宅
園田紛錯幾為魚鱉之鄰徇民之便則上令不行倚法
以行則下情易駭必也兩全之濟庶乎百謫之寬方聖
君臨御之初且哲輔蒐揚之始盍陳范轡以重漢軺胡

為四輩之除寔在一人之數皇帝陛下鼎新庶政器使百工載嚴更出迭入之規尤遴激濁揚清之選謂臣嘗分俟服粗諳州縣之事宜知臣存厠周行熟識朝廷之志慮不深尤於駕鈍故驟假於鴻私臣敢不祇奉六條力蠲百蠹念御極宅尊之日尤觀風問俗之時正己正人豈一用芟鋤之力足民足國庶永為休養之圖

淮東倉劉任

劉後村

偏郡剖符茂著守邊之績公朝出節就叨司庫之除問

官吏以兢心讀訓辭而感涕伏念臣單平一介坎壈數
奇承先世清白之傳慕古人忠孝之節務為軟熟既恐
負於初心稍自激昂乃見非於流俗積有風波之搖蕩
每蒙天日之照知甘屏伏於一丘偶推遷於三郡雖書
生乘障無可喜之功名然聖世和我亦粗嚴於疆場俟
竟金湯之役即尋香火之緣忽拜誤恩驟將隆指維准
左熬波之利軍國所資自海陵竭澤以來公私皆病姑
仍舊貫則無奮起之漸少有新意則涉更張之嫌凌雜

米鹽尚恐秋毫之難析馳驅原隰更虞風力之弗強深
哉簡拔之恩凜若曠瘼之懼伏遇皇帝陛下鼎新百度
甄別羣工察臣當官而行不知強禦之可畏謂臣在外
之久庶幾險阻之備嘗頃焉服奔走之勞或者究阜通
之策遂由支壘俾泣外臺臣敢不祇對龍光勉殫駑鈍
雖素無心計可洞識於源流惟不為身謀庶少裨於涓
露

泉州守到任謝

真西山

蕩節九州觀風何有桐城千里假寵過優倣見吏民敬
宣詔旨伏念臣性資慙拙學術迂踈入侍禁林徒守勿
欺之節出使乘傳曾微可錄之勞每慚虛負於明恩敢
謂更叨於劇寄泉雖名鎮古號樂郊其奈近歲以來浸
非昔日之比征權大苛而蠶琛罕至澇傷相繼而農畝
寡收宗支之廩倍增郡帑之儲赤立銀溢於山者亡有
歲為旁郡而代輸粟生於地者幾何日伺鄰邦之轉餉
罄罄乎鞭扑之苦盼盼焉帆檣之來凡茲數端尤為深

病顧雖一旦不可寧居切自揣於庸虛凜莫知其稱塞
茲蓋幸遇皇帝陛下燭臨萬國器使百工念臣篤於事
親期欲便旨甘之奉知臣嚴於律已或能銷貪鄙之風
進遽職以獎行錫溫綸而加勉臣敢不欽承異渥誓答
隆知庶平而吏民敬焉雖莫望漢人之政忠信則蠻貊
行也願恪遵孔聖之言

再任泉州守謝

真西山

奉祠居里每勤北極之瞻進職守藩復忝南州之寄甫

臨舊服恪布寬條臣聞天道至仁風霆無竟日之怒聖
君大度山林鮮終棄之材韓安國起於徒中柳宗元用
於貶所皆為長吏蓋值明時微臣乏漢唐二子之能陛
下守祖宗萬年之法昨者金華之入侍溫然玉色之下
詢曷嘗因諫以罪人自媿格君之無術方枘彈交上獨
亮狄山之愚迨需宥一頒盡洗元成之玷何啻於議罰
而樂於用恩庸見九重之奉心不忍一眚而棄物既班
次對又秩殊庭沒齒飯蔬夫亦何憾建牙作屏則非所

期敢圖朱轡皂蓋之華仍泣紫帽清源之境念昔先帝
付臣此州玩愒三年不聞善最侵尋半世復見遺民屬
當公私凋敝之餘不勝上下煎熬之急七邑而二為煨
燼十室而九乏蓋藏禁旅雲屯軍餉每難於宿飽宗藩
日茂俸緡半出於鑿空自省迂踈難為經理茲蓋恭遇
皇帝陛下道心淵靜德性昭融不以諛說為愛君故畧
臣撓鱗之譴不以聚斂為體國故取臣求牧之長畀以
舊封責其來效臣昔猶將母今獨攜孥祿弗逮於養親

志惟顯於報上拊摩瘡痛冀邦人生意之復還培溉本
根為聖朝元氣之一助

廣東倉到任謝

劉後村

起廢察州從天而下便私易地遵海而南具布漢條初
行粵俗臣切稽使指備載聖經君之遣臣也有光華臣
之報君也以忠信今百端之供億殆徧國中餘一髮之
本根獨惟嶺外方且糴舟之發銜尾差鈔之取及膚空
熙豐以來之儲增紹淳未盡之額使賁生而及見哀痛

若何雖劉晏之復生變通安出乃如臣者豈其任哉嘗
試弦歌本宓賤言游之緒論迨分符竹追陽城元結之
遺風久閒退而里居尤闊踈於時務疚心徒切著手實
難惟有清修革彼筐筥之類詎意謬巧取諸荷蓍之間
民生或不自聊臣死奚足塞責矧郡邑之三風猶熾與
閭閻之五瘴未蘓曾是人微欲其身率茲蓋伏遇皇帝
陛下記功忘過舍短錄長謂一男子妄上書本緣愛主
屬見大夫無可使遂取充員庶令荒遠之情悉達靖淵

之聽臣敢不褰帷而訪草奏以聞惟無瑕者戮人必先
已責以不貪者為寶可戢吏饕

知袁州到任謝

劉後村

遭噴言而去國自屏空山奉明詔以典州且叨善治已
臨封域具布詔條臣本起鰥生最為拙宦偶逢總攬遂
忝旁招猥塵公府之僚嘗奉便朝之對莫施螢爝裨日
月之清明雖批龍鱗覺雷霆之開霽惟小臣之孤立恃
明主以少安及速抨彈尚蒙涵貸支離賦衆方此養痾

象罔得珠俄而起廢唯袁為郡舊名安靜之區與盜比鄰今亦孤危之地城空無補兵少且孱以妄庸謬分千里之憂恐倉卒難待一朝之變而況別慈顏於膝下魂夢屢驚旅隻影於天涯宦游奚樂徒有君親之一念若為忠孝之兩全茲蓋伏遇皇帝陛下奮發主威作新吏治謂多壘艱難之際務求民安凡錄屏臨遣之人率由聖擇乃如臣等亦在數中臣敢不厚培本根申畫圻守長江之險與我共願為強敵之防四境不治如之何此則

微臣之罪

知榮州到任謝

李梅亭

佐黔巫之東鄙將及戌水守巴夔之南安濫叨符竹出
幕十年之未久循牆三命之唯恭冒象馬以牽江跨犍
牂而入境皆知聖主清衷之一視故令愚臣白首以重
來伏念臣殖學拙疎賦材褊淺耗精神於場屋得弗償
勞疲筋力於塵埃衰不待老頃繇故府入糾成均韓愈
補苴奚益茫茫之墜鄭虔輒軼軻難培衮衮之登久去國

以奉祠辱起家而貳郡敢意三刀之夢蜀復令五月而
渡瀘維今榮隱之邦實昔夜郎之壤貳耕火種矛浙劒
炊歲計經營之租無六千斛郡仰斥鹵之羨已五百年
此因刻木之花銷致辱前茆之根括熏鼠不嫌於穹室
奪牛反甚於蹊田凡昔留州悉令迭使無復斗升水之
貸存活介鱗縱得二千石之良終成狼狽豈其庸謬堪
此奉承茲蓋伏遇皇帝陛下政在養民仁不異遠雖蓬
婆雪外之戍萬里軫憂與長安日邊之州同時並命殆

念和義孤墉之陋未正紹熙潛邸之名三年弄印而印
剋四輩代庖而庖竭破凡削削不待張詠薦李畋之來
拔滯振淹蓋法藝祖任王明之意臣敢不謹身率下節
用愛人臣飲冰食蘖以自將勿為義疚儻求牧與芻而
不得甘俟罪歸

知邵武軍到任謝

方秋崖

以柳易播尚誤寬恩自浙入閩已祇遠戍感歎聖朝之
仁厚矜容臣子之慙愚伏念臣守剛而乏沉潛學朴而

少涵養事人以直道豈今世之能容得封如曲鉤亦生平之不取惟知公是未覺昨非粵從督議之參商出守廬山之僻小可以悔矣鄭商人之環何必爭抑有疑焉楚齊侯之地不相及夫奚湖廣之懷所具析江東之守臣不能忍於一慙已自甘於三黜為臣懼者皆曰南陽帝親惟天知之乃謂東朝公事第與更其符竹亦不俟於瓜時茲蓋伏遇皇帝陛下徧覆無私容光必照天下事惟其是而已何間賤微我之心亦有曲者乎一惟端

直故雖肺腑之請曾靡毫釐之差肆令危蹤無失故步
臣敢不仰憑公溥益勵直方毋虐煢獨而畏高明安用
前車之鑒與致平理而銷愁嘆勉為後效之圖

知均州到任謝

應松湖

承乏貳車僅解洪都之組分憂一障猥臨紫塞之衝戴
星厘百舍之馳就日仰九重之邃置身地僻引睇天高
伏念臣遲鈍無堪朴忠自許束書壁水恩深樂育之莪
射策玉墀濫折清香之桂蹤跡雖沉於州縣精誠敢外

於闕廷慈皇龍御之初論事偶陞於一秩禁從鶚書之
薦不才游忝於十科夫何坎壈於數竒動輒崎嶇於寸
進出裨會府甫及戍瓜入扣脩門遽叨剖竹小壘拜朱
轡之命大明邁丹宸之期從容錫對之溫抃蹈觀光之
喜雲天尺五退慙臨遣之榮道里數千恍記馳驅之舊
倣憇駿奔之郵傳敬宣鴻博之詔條藐是陋區介於絕
徼兵屯單弱萃瓦合之貔貅井邑蕭疎雜山居之麋鹿
塗艱通賈帑之宿儲三年四易於守臣百計一無於巧

畫誰言孱瑣亦玷選掄皇帝陛下繼照文明折衝神武
守衛中國謹采薇外治之防朝會諸侯飭車攻內修之
政役要荒於臂指嚴控扼於咽喉精東老成誤膺委寄
臣敢不鞭駑策鈍整蠹綏殘賴上威靈震聳疆表之境
道王德意拊安鳩聚之毗

知楚州到任謝

應松湖

十年宿衛愧無橫草之勞千里藩宣誤玷分符之寵戴
星比馭諏日眠龜覽觀雄勁之山川屹立崔嵬之雉堞

萋迷煙水慨清河之戰場慘澹風雲想淮陰之大將自
昔形格而勢禁於今民悴以兵驕非藉通明奚為經理
伏念臣馳驅行伍扞禦封陲福艾奇靡初乏燕領封侯
之相慷慨奮厲空懷馬革褻屍之心敢期瑣瑣之鷗冠
上簡煌煌之龍袞擢繇偏校入侍周廬玉陛九重扈宸
居之蠖濩冰河萬里使絕域之鸞旂夷險一誠骭髀孤
立惟睿算肅清於荒徼俾近臣鎮撫於遠眚誰謂孱虛
亦膺委寄皇帝陛下羈縻四裔襟帶八荒丹青之信甚

明靡使敵情之叵測赤白之囊未訖首嚴邊瑣之科條
信臣早戍封陲必嫻外禦念臣久陪環列能體上心寵
頒尺一之書俾紆丈二之組臣敢不輯綏療瘠彈壓躁
囂執弓矢而屬犍橐敢輕言於行陣明烽燧而嚴斥堠
惟謹固於封圻

轉官除職謝

謝轉大中大夫

分間罔功虞典尚寬於幽黜拜官甚寵漢恩特示於超

遷疏渥雖優循涯有覲臣竊考本朝之定制尤嚴四品
之文階秩視諫大夫豈為高選官非真法從不可序升
政須耆舊之人始稱褒崇之數如臣者素無事業誤簡
眷知入扈蹕於九宸出總戎於四路際風雲之會曾微
橫草之功累日月之勞徒起取禾之誚通班浸峻論報
滋難茲蓋恭遇皇帝陛下德極照臨政先綜覈三載考
績尚存隆古之遺八柄馭臣庸作羣工之勸遂令冗跡
亦玷邇聯臣敢不祇若綸言誓殫綿力身居外服雖莫

陪禁近之游力守孤忠庶無忝論思之職

捕獲海寇謝轉官

真西山

銅竹分符實任九重之託管蒲徹警幸臻千里之安寔
責已憂叨榮寔懼伏念臣材非敏捷志切撫摩田里熙
熙粗喜桴鼓之息波濤洶洶忽聞舟楫之驚念非逆折
其萌芽將恐難圖於滋蔓協兵民而進討賴將士之宣
勤怙衆陸梁始猶出柙之兇望風披靡卒為遊釜之魚
訖憑藉於天威遂肅清於海服效非循吏敢期漢璽之

褒名在大夫俾晉唐階之峻退循非據莫獲終辭茲蓋
恭遇皇帝陛下明照無私功疑惟重可以與可以無與
姑從勵世之權簡厥修簡或不修庸示馭臣之柄顧雖
駑怯敢昧激昂受賞無名愧貽譏於鵜翼報恩有地誓
輕死於鴻毛

轉寶章閣學士

方秋崖

邊城分閫曾莫畫於一籌遽閣進班乃併躋於二秩幾
措躬之無地靡容力以回天臣歷觀古者封疆之臣皆

有隱若藩垣之勢鄧訓校尉耳而鮮卑不南牧舒翰將
佐耳而朝廷無西憂彼何人斯有為若是而臣見謂碌
碌徒抱區區咨慙裕由乃父功竊愧西平之子惟邊鄙
為中國患每勤北顧之思慨氛祲之奈何易星霜其屢
矣雖農革之言猶在然枕戈之志未酬奚有壯猷驟叨
誤渥茲蓋恭遇皇帝兼收羣策共濟多艱采薇歌以遣
之每興懷於戍役菁莪能樂育也諒拊脾於人材故恩
寧失之過優詔弗俞於終遜若為稱塞無負遭逢臣敢

不竭禦侮之謀佩折衝之訓執干而衛社稷思見乾坤之清夷挽河而洗甲兵允賴君王之神武

除華文閣直學士謝

方秋崖

守塞何裨驟班媯閣循牆莫避祇服堯言欲更陳一得之愚懼有瀆四聰之聽臣觀近歲旄頭之彗痛諸邊兵氣之纏尺箠以答共憤強夷之猾夏寸陰可惜盍收羣策以防秋乃今疆場之間曼隔朝廷之遠脉絡不實精神自疲嘆內詛而外訐維其棘矣雖朝奏而暮報尚竊

遲之胡為書檄之交馳竟令歲月之虛老興言及此誤
事謂何若然則寓直於西清亦奚以解憂於北顧矧若
臣者本無能為毛錐子安用哉久有從戎之悔黔驢技
止此耳曾微分閫之勞故四年東征而無以宣皇明羣
醜南牧而無以遏亂畧正慙公議乃玷殊褒茲蓋恭遇
皇帝以神武馭英豪以忠厚用刑賞慨事會之無極慮
莫先於儆風寒念人才之實艱愛之甚於護元氣肆頒
渙汗靡徇巽章臣昨已丐骸第深刻骨未先狗馬填溝

聲敢忘報國之忠其友麀鹿侶漁樵恐誤臨遣之寄

江西漕除直秘閣謝

施養浩

掌計外臺念救菑之何益陞華延閣驚渙寵之非常恩
出自天感深跼地伏念臣資深學淺致遠才疎早際會
於昌期遂叨陳於煩使問錢穀之入裨稼政以奚勞圖
田里之安剖竹符而罔效方切曠官之懼洊分澄按之
權孰是火維之區適此未饑之變腰鎌所刈豈無樂歲
之三肱篋相仍窘出平時之倍一心黽勉數月支持上

惟廣於聖恩下率先於僚屬天心助順既五風十雨之不愆穡事有秋豈千倉萬箱之足計疇昔劍刀之佩祇今襦袴之謡皆明君矜卹之功何小臣奉行之力而乃叨膺異數進陟崇班以荒政十二而聚民愧酬庸之焉有乃取禾三百而不稼徒冒賞以為慚伏遇皇帝德本好生道存兼濟焦勞黃屋以百姓之心為心拯恤黔黎後天下之樂而樂迺眷此邦之旱尤深當宁之思推厥本原吏之責爾形於綸綍已若使然迨茲安集之期慙

爾綏懷之賞有如駕鈍亦被龍光臣敢不體上憂勤與民休息災流行而代有敢恃常豐備先具而積多當圖後效

除端明殿學士淮東制置大使謝 方秋崖

青冥授鉞適遵廟筭之長紫殿通班驟峻使名之大曾未寬於憂顧乃誕示於榮懷久矣循墻惴如臨谷臣惟端殿所以待儒學大閭所以重威權顧自愧於諛聞莫遠稽於前載言觀帝綍謂復家羶寧知不肖之孤所謂

無能為役蓋以先臣繇科第出臣則不過司勲之賞官
先臣以物望聞臣則不過守邊之庸吏況五年於外役
殆四鄙之皆驚其如瞑目而有知何所施顏而下見世
選勞予不掩善允謂誤恩考作室子弗肯堂父孤先訓
今者臣父建大閭於十年無塵之後而臣非久任臣父
榮端殿於九原莫起之餘而臣則身親勤勞不及者遭
際過之學問無聞者清華已甚此蓋伏遇皇帝以天保
采薇治内外以洪範皇極克剛柔惟干戈省厥躬久切

焦心之慮遣將率衛中國每勤拊髀之思迄使微臣越
膺異數臣謹無忘嘗膽永矢捐軀朝廷有自治之期其
偷安之為戒黎庶具道隆之望知隱願之非虛對越明
謨有如皦日

除寶謨閣學士知泉州

何尚書

李梅亭

老臣納祿勤大造之曲成遽閣升華分雄藩而出守帶
宜褫而或錫衣既敝而改為有渥一麾恪共三命伏念
臣去天雖近來日無多游干不得謝之恩力控致為臣

之請鴻鴈高舉已絕望於稻梁牛羊下來難更求於芻
牧敢意冕旒之遽曲怜簪履之遺溫洛寶儲增賁嚴凝
之直清源巨鎮俾需更戍之期仍分在笥之裳益耀還
鄉之綬於臣侈矣何日忘之所慙大耋之侵恐負細書
之賜茲蓋恭遇皇帝陛下仁不遺舊恩欲成終郡守選
用賢良顧資已老之龔遂學士足為光寵反加告去之
知章雖非為官而擇人殆於養廉而勵俗臣敢不磨礪
晚節佩服宸恩桑陰幾何誓不忘於傾日瓜期而往願

卒聽其引年

除閣學知潭州

鄒給事

李梅亭

解組外藩屢控陳情之請晉班內閣仍叨改秩之恩冒
伸僂僂之再三難拂顏威之咫尺綸言已布綿力奚堪
伏念臣材弱弗張資凡不穎歲糜月費已成四十九之
非君寵母恩未有萬分一之報徒以南陔之相戒難乎
西廣之久留力於白祠志在出嶺敢意躡躑於美職復
令假守於名邦湖廣之壤三千夙稱清絕之地瀛洲之

士十八上通碧落之天矧超階級之崇殆非堵墻之允
豈緊踈拙可稱選掄茲蓋伏遇皇帝陛下眷厚近臣恩
隆遠服念臣一麾之出守游歷歲華察臣四國之于蕃
粗諳民事特峻西清之秩更圖南土之居俾諧便養之
私兼課承流之效臣敢不思酬簡注勉策疲庸超遷而
至大中賈誼何辭於湘水光寵而兼學士知章終願於
鑑湖

加職謝

謝加龍制因任

王格齋

分閫罔功恐坐黜幽之典出綸有命忽叨進律之除是
何宜斥而反遷藉甚以榮而為懼牢辭不獲重拜靡皇
伏念臣早竊儒科晚塵禁從民曹經幄殊深非據之慙
松徑菊籬屢起歸休之夢偶值龜城之謀帥俾承芝詔
以充員屬干戈甫定之餘而杼軸已空之久雖勤拙相
補里閭稍稍安之然衰病交侵精力駸駸憊矣方上祝
釐之請敢圖錫命之榮誤恩俄被於龍光寵秩載騰於

鳳檢幹方錦里已寬庭特之誅侯對松階更冠寶儲之首陞下天臨廣宇子視遠民察知几案之小材寔維簪履之舊物雖政拙自注下考僅輸撫字之勞而賞疑所以廣恩式彰忠厚之意但臣駕材素下鼠技已窮深虞末路之艱併使前功之廢臣敢不益鞭其末圖謹厥終抖擻精神勿蹈虧功之戒逍遙田里終期從欲之仁

謝加直學士再任

王格齋

遐取分閭踐更久過於瓜期遽閣陞班申命復煩於芝

檢山川如舊寵渥維新循墻力控於陳辭出綽莫迴於
成渙伏讀溫詔益震危衷伏念臣結約無竒侵尋已老
入持禁索論思莫效於嘉猷出帥藩方撫字第勤於拙
政方凋瘵瘡痍之未服嗟勞徠安集之良難雖几案麤
材或謂頗堪於煩使而蒲柳弱質其如已迫於凋年曩
嘗力控於封章止願退安於閑散乃俾解裝而承乏且
蒙進律以䟽榮日往月來倏已復周於歲籥心勦形瘵
惟憂浸蹈於官箴投誠方切於丐歸有識咸譏其已晚

敢謂峻除於寶宸居然就撫於油幢深虞併廢於前功
無以仰承於睿渥陛下天臨百辟器使羣工欲使蠶叢
魚鳧之區如在豐鎬鄠杜之側肆綏遠服重簡淵衷謂
道州之考何長姑令撫字而許丞之聲不去可免送迎
亶時頽墮之蹤假此斯須之寵臣敢不恭承明命罄竭
謏材老馬力疲末路分甘於伏櫪窮猿意迫歸心第切
於投林

明堂加邑謝

袁安撫加食邑謝

陳質勳

藏事紫壇甫洽駿奔之喜疏恩黃屋驟膺龍命之華分
地云初戴天敢後伏念臣一叨內甸再遇總章時當龍
位之方升新忝雞翹之末綴雖陪薦玉莫相鳴鑒敢圖
五等之封與被十行之詔皇帝合秩禮重並侑誠深宗
祀明堂不獨言邦家之典受釐宣室亦欲均臣庶之歡
燕及守京亦霑胙土言功無有拜賜已多秩石二千既
合率先於侯度取廛三百尚思補報於君恩

降職祠謝

謝降直學士

劉後村

愚臣引咎甘寘嚴科聖主隆寬稍裁華職危蹤甫定感涕橫流伏念臣以疎庸之才當董統之寄奉玉音之臨遣專欲息民凡綿力之經營第惟固圉一從索敵再入浮光勢旣披猖事誠危急念全軀保妻子之計夫誰不能然以賊遺君父之憂於臣何忍况制閫有便宜之旨而兵家有牽制之謀指授之初預戒其貪功而倖勝文

移所至每令見可而知難邊頭皆奏於膚功京口獨違
於節度及師潰肆城之下以身當淮左之鋒寢息不遑
鬚髮皆白席藁私室抗章公朝謂馬謖敗於祁山亮先
貶等任福敗於好水琦亦奪官彼元老以猶然臣何人
而自恕矧欲謝三軍之衆靡容恤一已之私懼方凜於
冰淵戮宜加於蕭斧訖從寬典亶出異恩茲蓋恭遇皇
帝率作事功丕昭賞罰憤神州之責盍歸王衍之諸人
誓殺陵之師不棄孟明之一眚故加薄譴庸示至公臣

敢不堅守孤忠痛思往咎佩大易匪躬之訓固莫辭難
味先民陳力之言終當知止

趙龍圖落宮觀謝

方秋崖

囊封自効分投荒裔之居綸音載頒僅削直庭之秩感
寬恩之天大隕孤涕以雨如臣本乏脩能誤叨重寄有
死耳不可屈每思馬革而裹之今老矣無能為豈知龜
技之窮已粵臨峴首遄警旄頭俾環城餘韎鞬之腥痛
列郡化夔臚之宅禍一至於此極身百戰以何裨賴國

之威彼酋其遁而臣材不足以禦衆智不足以察姦狴
羊觸藩尚駭塞垣之未靖虎兕出柙詎圖家賊之難防
變忽起於蕭牆勢竟隨於屏翰擢髮以數噬臍莫追思
昔先臣久茲分閫析薪罔克負荷孰云泉壤之無知稽
田旣勤敷菑切歎金湯之安在謂且賜屬鏤而肆市不
然禦魑魅於九夷敢意清朝曲從輕典此蓋恭遇皇帝
仁深在宥德洽好生意若曰美及子孫盍稽八議幸天
以賊遺君父姑緩五刑訖回物論以并包用貸微軀於

顯戮臣敢不省厥讐於羈旅終其老於累囚念死有餘
辜莫寢逆雛之梗化倘生無以報當為厲鬼以滅讐

叙復

叙復元官

真西山

瞽言觸憲宜坐錮於終身慶澤流徽迺悉還於舊物幸
逾始望恩出更生伏念臣昔綴周行嘗濟內直花輓晝
日久承寧考之恩蒼梧暮雲忽洒茂陵之血屬際飛龍
之運首叨馳驛之招念非忘身何以報國欲勉圖初政

之助庶無辱先皇之知而臣學泥古陳識乖時變無袁
盎之慷慨有汲黯之戇愚聖君非不受言臣自踈於開
導國人皆稱有罪上獨示於矜容弗貶潮陽之八千僅
奪駢邑之三百出畫如孟子豈懷悻悻之私在畝若劉
生徒抱拳拳之意雖欲磨鉛而自效終虞復玷於孔艱
遽頒紫詔之新盡澡丹書之舊秩仍元士班視邇臣閤
館珍臺愧更偷於廩祿鈞天廣樂恍如侍於威顏人皆
謂榮臣獨知懼茲蓋恭遇皇帝陛下聰明天縱聖敬日

躋方東朝丕衍於脩齡而南面躬臨於曠典導民以教
既洽四海之歡與物為春忍視一隅之泣釋羈魂於幽
甾返逐客於囚山爰及顓蒙亦皆牽復臣敢不淬磨宿
志湔滌曩愆犬馬之養無他惟篤愛君之義江湖之身
雖遠敢忘在闕之心

復元官職宮觀謝

方鶴山

七年流落幸全投裔之軀三命便蕃併賦祝釐之廩望
不及此得之若驚臣賦資顓蒙聞道狷淺自玷言語侍

從之列期効論思獻納之忠而識闇不足以周事情才
踈不足以濟時用况卧疴之既久宜公論之不容白簡
霜嚴已甘大僂皇圖天廣特沛寬恩僅從三褫之科姑
寘五谿之表雖江連楚蜀無瘴鴛跼跼之憂然地控蠻
獠猶有暴虎兢兢之慮忽自天而有命俾使道以過家
盡復元階實踰始望况申榮於書殿又假寵於祠宮
光流聞時謂叔見茲蓋恭遇皇帝陛下德侔覆載智燭
幽深憫臣斷斷無他昔有負薪之憂察臣慙慙自守嘗

輸曲安之忠粵從祭澤之游頌已動聖心之遐軫上東
朝之壽年下春日之寬書肆命元臣式商大賚臣誓堅
晚節益勵後圖今為牛羊求牧芻已荷更生之造未先
狗馬填溝壑疇非報德之期

謝復寶謨閣學士

劉後村

罪當貶等奉以周旋恩不踰時復其玷缺拊躬感涕讀
詔汗顏臣昨者憤敵憑陵出師牽挽偶邊將有僨軍之
咎在兵家存責帥之文急自列以伏辜終不忘於敵愾

賈率連營之吏士糾齊諸寨之民丁分道邀遮阻山鑿擊我方乘勝旣獻馘之屢聞賊恥無功尚遊魂而不去臣親提突騎往撫顏行將背水以夾攻使躋輪之勿返黠酋先遁倖免鯨鯢殘黨繼奔散如鳥獸然後患方長而未竟顧薄材已試而可知衆口難調親年篤老憂國之心如灼論兵之鬢已霜方陳累疏以丐閑乃用微勞而牽復茲蓋伏遇皇帝陛下操持威柄綜覈治功謂事有至難寧保用兵之利鈍念臣無他技粗嘗在外之險

艱還其筆索之班責以桑榆之效臣敢不深思大計益
謹後圖觀過知仁允蹈聖人之明訓鞠躬盡力仰希前
哲之盛心

翰苑新書後集上卷二十五

欽定四庫全書

翰苑新書後集上卷二十六

賀牋

皇太子

賀東宮

劉後村

國嚴常祀載循重屋之規帝享純誠爰輯儲闈之慶

中

賀
恭惟皇太子殿下望隆貳極儀亞至尊事天不以文
既成熙典受祉施於子宜介鴻休臣幸際昌辰適縻外

服陪奉璋之彥莫遘邇聯瞻主鬯之賢第祈景貺

元旦

賀正旦

江西漕

施養浩

鳳歷頒春餞餘寒於北陸龍樓催曉介異祉於東宮恭
惟殿下盛德淵冲懿文日就禮嚴定省時甫畢於冬溫
學自緝熙功又申於春誦肇更歲律茂對天庥少海波
澄協祥風之解凍浮雷地奮催好雨之知時臣將漕西
江馳神甲觀門森雞戟方新桃板之題酒酌獸樽莫擬

椒花之頌

賀正旦

劉後村

春陽萌動肇紀王正儲極遽嚴是膺帝祉歡騰寓縣慶
屬宗祧恭惟殿下迪德溫文挺姿英晤難鳴問寢仁孝
之譽日隆竊禁談經學問之功時敏茲臨華歲茂介繁
禧臣分閭攸拘造庭伊阻丹墀設仗莫觀元日之儀青
地稱觴愉睇前星之曜

賀元正

丙子代衛參政

李梅亭

堯年起丙載新鳳歷之頒夏正建寅仰協龍杓之指萬
邦以正百祿是道恭惟皇太子殿下賢智夙成溫文天
稟春回嶰谷剛潛蒼震之亨日出隅夷柔麗黃離之吉
履端於始長發其祥臣攜忝儲寮今叨蕃牧後天下而
樂濫假寵於虎闌布正月之和遠馳神於象魏

賀元正

應松湖

太簇宣和驗飛葭之應律少陽拱極絜若木以交輝山
河回一氣之春歷數衍萬年之慶殿下乾九四之潛德

震一索之長男問寢雞鳴紫禁耐煙花之繞賓賢鴻翼
皓眉峙柏雪之堅先生青輅之旂歡溢蒼龍之闕臣濫
分竹使遯蔭叢霄初日紀乎星躔遙認前星之照仁風
翔乎海表孰非少海之波

至節

賀冬至

李梅亭

黃鍾協律七日驗於復來青輅發祥萬物由乎震出式
衷蕃祉茂對新陽恭惟皇太子殿下海潤星輝金聲玉

裕行一物而得三善儲德克岐奏六佾而建九旗禮容
有奕履此應長之侯昭哉滋至之休臣假守熊湘阻趨
竊禁合八能於漢殿阻陪北闕之趨襲九辯於楚詞請
祝東皇之壽

賀冬至

劉後村

緹室吹灰迎長伊始青宮主鬯受祉維新和溢殿闌歡
騰寓縣殿下性根仁孝學造高明入侍嚴宸常謹雞鳴
之問出親端士適觀鴻翼之成對陽德之方亨慶天休

之滋至臣踰瞻竊禁屬綰麟符廣輝潤之歌雖慙詞藻
賦岡陵之什願祝壽祺

生曰

董侍郎賀東宮

李梅亭

十四月而生堯實開昌運八百國之歌啓允屬休期慶
衍宗祊驩騰寰海恭惟皇太子殿下聰明時憲聖敬日
躋震一索而亨是為天地之長子離重明而照孰窺日
月之容光茲臨載育之辰益衍永膺之福臣濫分閭寄

莫旅庭趨敬與六十州之民仰瞻銀闕共祝八千歲之
壽永紹瑤圖

謝牋

皇太子

除官謝

何尚書除刑侍

李梅亭

刑曹劇部貳職非輕法從真除參聯甚寵况加盛服仍
束精鏐拜使便蕃拊躬震疊伏念臣力綿材薄歲暮日

斜舊陪碧落之班屢玷清華之選一笑微生於偃月十年甘老於臥雲豈意餘齡復還舊綴狐裘破碎囊持紫以謂何竊骨支離腰圍黃而不稱請循僥冒亶有寅緣茲蓋伏遇殿下粹德玉溫凝姿海潤賢孝仁聖聞天下未始自驕左右前後皆正人尤勤博采故令蒲質得傳楓宸臣敢不祇服寵光對揚休命論思獻納期殫入告之忠惻怛哀矜仰體好生之德

轉官謝東宮

謝轉大中大夫

劉後村

謫材分間未補一毫優詔遷官驟登四品命倣頒於丹
陛恩密戴於青宮伏念臣奮跡卑寒逢辰休顯入持紫
橐何補論思出建碧油更慙風望屬會吏銓之課猥升
法從之階茲蓋伏遇皇太子殿下迪性溫文挺姿明睿
承顏廣內恪修問寢之恭聽事嚴宸密贊求才之治肆
令踈逖亦遙高華跡遠甘泉空綴嚴吾之列心依少海
莫陪園綺之游

郊祀轉官謝

衛參政轉官謝

李梅亭

園壇八陛錫福庶民方岳諸侯進官一列併爰田而增
衍邈少海以知歸伏念臣一去賓階六周歲籥高飛鴻
鵠寧資羽翼之功行中鷹和莫効箴謀之助况南浮於
湘水徒東望於瑤山恭聞肆類之休遙想百神之享敢
圖賚予若是駢蕃此蓋伏遇皇太子殿下相祀紫壇疏
恩赤縣悟南陽之牘風亶聰明記東海之名弗遺故舊

昭茲異數施及孤蹤臣敢不祇服恩言益圖美報賈誼
自傷其無狀既見受釐吳芮勢踈而最忠尚希著令

明堂加恩謝

吳縣開國伯加食邑謝

劉後村

職居藩屏阻侍親祠恩錫土田例沾餘餽省躬負愧稽
首拜嘉臣載考熙朝尤隆宗祀凡在合宮之列宜均宣
室之釐而臣方奉藩條亦叨祭澤爵每陞而漸峻祿已
厚而彌增茲蓋伏遇皇太子殿下學進多聞政由參決

深宮主鬯恪恭膳寢之儀重屋貳觴密侑馨香之薦故
盼惠術俾衍真租臣敢不勉竭微勞少酬洪賜班超護
塞方當固圉之時張翰思吳未有歸田之日

講經轉官謝

講春秋轉官謝

施養浩

釋麟經之奧旨甫及終篇錄馬走之微勞例加華秩拜
恩甚腴撫已若驚伏念臣性本穎愚學慚固陋昨遽元
僚之屬獲紬比事之書日繫之文念措辭而安敢月將

之學自逢原而有餘徒殫誦說之云何有涓埃之補况
更歲久甫幸徹章既易司存亦叨懋賞所謂因人成事
何止貪天之功伏遇殿下性本生知教由早諭研筆削
之旨自得於心備講讀之官不忘於學凡自經帷之啓
及今賞典之行悉本贊成祇慙忝冒臣敢不益鞭其後
思稱所蒙既學而師不勞但欽異稟善賞而人多勸誓
竭孤忠

謫降謝

降直學士謝

劉後村

疏陳往咎自請抵辜詔黜隆名尚令任責雲天施大淵
谷愧深伏念臣早荷國恩晚分閭寄我固守睦鄰之信
彼屢興犯塞之師勢既蔓延法當牽制師行危道雖將
帥之非才責在元戎顧偏裨之何罪亟披誠款自列誓
尤恐不免於嚴誅乃僅裁於華職茲蓋伏遇皇太子殿
下力裨聖斷密輔陽剛謂邦有常刑豈容屈法然時方
多事不忍廢才示以薄懲俾之內訟臣敢不深思既往

預戒未然尋香火之緣方伸前請收桑榆之效恐負初心

叙復謝

復寶謨閣學士謝

劉後村

扣閤自疏僅黜隆名扞塞何功忽還舊觀凌兢拜命跼
蹐懷慙伏念臣昨緣邊將之踈力引中權之咎尚寬萬
死止裁筆橐之班自奮一行果奪旃裘之氣始蜂屯而
不去俄獸散而遂空亭障解嚴耕桑安業旣竭節徇國

家之事始抗章陳母子之情所冀歸休乃令牽復茲蓋
伏遇皇太子殿下謹修儲德參決政機謂治世賞刑不
容偏廢然兵家利鈍非可逆知棄已往之瑕疵錄後來
之勞效臣敢不益思振勵期稱寵榮讀誓敬之書未忘
前過陳出師之表永愧先賢

賀皇后箋

聖節賀皇后

方烏山

華渚呈祥適際太平之運椒塗衍慶丕昭坤順之符喜

動六宮和熏萬宇

中賀

恭惟皇后殿下瑞鍾夢月功媿

補天以儆戒相成功靡渝於九變以勤儉為德治果格
於三登光輔聖躬永膺帝祉臣攝承斗壘阻造星聯頌
億萬年王休莫罄南山之祝想二十七世婦徒瞻西內
之儀

冊后

賀皇后受冊

李梅亭

楓宸發冊渙號揚庭椒殿升賢坤儀正位喜溢六宮之

表歡騰四海之濱恭惟皇后殿下配德河洲發祥沙麓
赤城秀氣大邦夙表於覲天白雪詠高厚德寔宜於配
地慶長秋之定序均函夏以蒙休臣聳聞三瞿之升喜
極六鼇之抃施于中谷萋萋諒感於葛覃陟彼高岡采
采敢布於卷耳

上尊號

賀壽成皇后

趙南塘

聖皇發冊帝后同升鉅典告成家邦具慶

中賀

臣聞天

昨光德世有哲王必得乎親迺立厥配既作之合宜正
其名恭惟皇太后殿下椒德溫芳蘭猷茂悅肇霸沙麓
瑞已應於造舟麗美河洲祥仍開於考室陰化久禋於
海潤柔儀允協於閭慈屬舜志之承堯闡文謨而命武
乾父坤母既登太極之尊日君月妃遂繼重離之照國
風有本孝治維新臣為郡罔功逢辰竊幸想禮容之授
盛鳳亦來儀誦詩雅之齊徽麟其出應

玉璽

賀皇后

趙南塘

戎方獻寶大陳元會之儀祖廟納珍永錫萬年之祚祥

開寓縣慶溢宮闈

中賀

恭惟皇后殿下道順而體方德

隆而志降黼黻不亂執瓚儼其思齊宮商相宣珮珩中

乎肆夏日月之光璧合乾坤之貺鼎來赤鳥覲王庭燎

無晏朝之失玄圭授帝塗山有內助之功臣欣託宗盟

幸逢盛旦雖鋪閤休鏤玉牒老將至云然陟高岡懷金

壘遐不謂矣

誕皇子

賀皇后

陳質聰

坤元底順昭格三靈之休震索發祥上闕九廟之慶照
臨攸暨抃蹈丕同殿下外惠宗正內隆陰教神罔時怨
有開熊夢之占天惟顯思於赫龜圖之福久肇元良之
望寔覃岐嶷之資邦永孚於休民亦職有利臣職雖在
外喜則由衷稽首漢殿之觴雖莫參於鴈綴傾耳堯門
之瑞實深激於葵心

賀皇后

周山房

前星見象燦騰乾璧之輝吉夢維熊協應坤闈之慶澤
流寰海喜溢彤庭

中賀

臣聞世祚之長允藉本支之茂

然誕彌於甲觀渡江多在於初潛若震夙於內朝自昔
幾成於濶典昊穹錫命河嶽炳靈有開繼序之皇肇啓
元良之粹皇后配天作合克嗣於徽音飛日入懷果鍾
於正嫡神祇底豫廟社莫安臣邈戍偏州阻陪近綴輒
傾葵向仰瀆椒塗率九嬪以祀高媒已格衆多之兆生

三月而見外寢遙觀岐嶷之成

賀皇后

趙南塘

後宮告慶昭坤載之含宏甲觀書祥壯皇基之赫奕羣
生幸甚咸曰休哉

中賀

恭惟皇后殿下齋休軒圖嗣音

京室寬柔以教貫魚之寵惟均福祿遂成駟鳥之祠旋
應帝心式慰母道益隆臣服在廩人攝承臬事聽諸輿
誦振振尚報於賡歌各以職言僕僕何嫌於亟拜

賀皇后

趙南塘

藩邸承休獻熊羆之吉兆宮闈受祉應麟鳳之昌期凡
在載持皆惟拊膺中賀恭惟皇后殿下坤裳襲美雅瑟
流徽而色而康人陰蒙其惠澤以似以續天顯報之福
祥秀發孫枝慶鍾慈極倬靈潢之衍派綿寶祚於隆基
臣幸對亨嘉屬官遠外卜日以告元祀雖莫陪宗祝之
儀采詩而誦多男猶得效使臣之職

賀皇后

趙南塘

王假有家薰太和而保合帝降之福衍多祚於綿洪凡

具識知敷同抃蹈

中賀

恭惟皇后殿下流謙而節施順

比以類從大呂贊陽之功百嘉均鬯小星逮下之德六
寢具孚故當肆通交泰之期而獲迓續延光之報神靈
孚豫符應闡明臣遠省民風側聆國慶望雞冠之列衛
莫遘清班賦螽羽之卒章徒傾善頌

冬至

代賀皇后

方烏山


聖人御極方開九變之符太史授時新驗一陽之氣暖

回葭室喜溢椒塗

中賀

恭惟皇后殿下德齊姜任名儷

賈馬以臣道奉宸極未天明而脫簪以女功儀後庭候
日長而添線履茲復反至矣坤承臣假守南州阻趨西
內時和不害方占五物之書剛長自今恭致多男之祝



翰苑新書後集上卷二十六